

ASTELEHENEKO Goienkaria

2010eko maiatzaren 24a > Astelehena > VII. urtea > 278. zenbakia > 1,10 euro

Goiena 10 URTE
www.goiena.net TOKIKOM

"Nahiago dugu Murtziako edo Ukrainako produktuak erosi, baserrietakoak baino"

Gurutz Garmendia
Baserriko produktuen saltzailea > 05



G2a Aretxabaletako memoria historikoa > 29

ARAMAIO Patxi Uribarren euskaltzain osoaren sarrera ekitaldia barikuan > 20

GOITIBEHERRAK 'La gondola del amor' jaun eta jabe Bergaran eta Oñatin > 21

KULTURA Punk festibala Errekaldeko jaietako bariku gauean > 30

36KO GERRA > EKITALDIA

Egiaren batzordea osatzea eskatu dute

ELGETA 'Gerra zibila Euskal Herrian: Ibilbide tematikoa Intxortaren magalean', inauguratuta

HUNKIGARRIA Espaloian egindako irekiera ekitaldiak oroitzapen gogorrek ekarri zituen > 04

JENDARTEA > AISIALDIA

Aspaldiko jolasak bueltan

Txapa, ziba eta kanikak umeen eskuetan osterara > 02

AURKIBIDEA

Debagoiena > 04-07
Elkarrizketa > 08
Iritzia > 10
Herriak > 11-20
Kirola > 21-27
Kultura > 29-33
Saikatuak > 34-35
Denbora-pasak > 36
Telebista-Irratia > 37
Berri-zakua > 38-39

ELKARTASUNA > DEIALDIA

Jose Luis Elkororen alde, martxa Palentziara

Ekainaren 6rako egin dute deialdia Bergaran sortu berri duten *Jose Luis Elkororen Libre* plataformako kideek. Alkatari ohia elkartasuna adieraztea adostu dute, herrira atzean dagoela sentitu dezan; baina azken helburua da Jose Luis Elkororen kartzelatik ateratzeko biderik motzena topatzea. Eguenean egin zuten lehen bilera eta Jose Luisen lagun askok esku hartu zuten, erretiratu askok. Bigarren bilera astean izango da: eguenean, 19:00etan, udaletxean. > 04



PAZKOAK Egunez eta kalean egin dute festa gehienbat bergarrek.

JOSETXO ARANTZABAL

Jaien bigarren txanpan, gaur Koadrilen Eguna

Temperatura altuak eta kaleko giroa izan dira Pazkoetako lehen txanpako ezaugarri nagusiak. Gaur, Koadrilen Eguna da Bergaran; blusak jantzi eta festa giroan murgiltzeko aukera paregabea. 750 lagunek eman dute izena herri bazkarirako. Bihar, nagusien eta umeen txanda izango da eta Bitorianatxoren igoerarekin agurtuko dituzte jaiak. > 12-14

Elhuyar-en panpina eta jokua opari. Nahi?



Zoaz 6. orrialdera

JENDARTEA > AISIALDIA

Txapa, ziba eta kanikak umeen eskuetara itzuli dira ostera

EKIMEN ASKO Erakundeek, ikastetxeek eta elkarteek lanean dihardute betiko jolasak berreskuratzeko; egunotan horrelako lau ekimen egon dira bailaran

IKASLEEN TOPAKETA Egubakoitzean, Debagoieneko eskoletako 275 bat umek parte hartu zuten Eskoriatzan egindako joko eta jolas tradizionalen IX. topaketan

HELBURU HIRUKOITZA Jolasak ez ahazteaz gain, gurasoek haurrei horiek transmititu ditzaten eta talde izaera berreskuratzea bilatzen dute

MIRIAN BITERI > BERGARA

Gaur egungo jolas gehienak teknologiarekin lotuta daude eta ume askok ez dakite gustura egoten esku artean bideo joko edo kontsolarik ez badute. Orduak ematen dituzte mugimendu handirik eskatzen ez duten jokoekin. Horien ohiturak aldatzeko beharra ikusi dute eta lehengo jolasak berreskuratzeko lan egiten ari dira bailaran.

Gezurra badirudi ere, azken egunotan lau herritan egin dira horrelakoak Debagoienean. Egubakoitzean, Goi-eskolako joko eta jolas tradizionalen IX. Topaketa egin zuten Eskoriatzako kiroldegian. Bailarako 275 ume inguru izan ziren han. Zapatu goizean, berriz, Arrasateko Santa Marinako ludotekan ziba, txapa, kanika, kromo eta txingokarekin ederto pasa zuten. Oñatin, berriz, Txantxiku-joko txapelketa izan zuten gazteek arratsaldean. Bergara ez zen gutxiago izan eta jaien harira, aspaldiko jolasak antolatu zituen Jardunek, domeka goizean.

TRANSMISIOA

Egunotakoa gutxi balitz, *Kataia eten barik* egitarauaren harira, Eskoriatzan ere jolas tradizionalen jaialdia egin zuten apirilaren amaieran. Kultura teknikari Arantxa Unzuetak gogorarazi du aurten transmisioa landu zutela ekimen multzo horren barruan, eta jolasena familia giroan egiteko jai ezin hobea zela iruditu zitzaizela.

Unzuetaaren arabera, "jaio garenetik ikasten dugu, baina hazten garenean, ikasi duguna ere irakatsi egiten dugu. Horren harira, egitaraua antolatzen genbiltzala, ohartu ginen hainbat gauza galtzen ari direla; tartean, ondo transmititu ez direlako edo gizartea aldatu delako". Horri buelta eman nahian, jostuntza edo amamak sukaldian egindako errezeten gaineko tailerrak eta jolas tradizionalen jaialdia egin zituzten. Azken horren harira, nabarmendu du egungo umeek beste joko mota batzuk dituzten arren, ohartu behar dira ezer behar ez duten hainbat joko ere badaudela.

Bergarako Jarduneko Nerea Mendizabal bat dator azken horrekin: "Ematen du guztiok antzerako bidea hartu dugula; hain justu ere, betiko jolasak berreskuratzeara. Horri buel-



> **ZIBA** Jolas horretarako jolaskide bakoitzak ziba eta soka bana behar ditu. Zibak dantza egin dezan, soka bat lotu behar diogu horri, eta jarraian, indarrez lurrera botako dugu. Kontuan izan behar dugu ziba dantzatzeko lurra gogorra izan behar duela.



> **TXINGOKA.** Lurrean laukizuzen handia margotuko dugu eta hori hainbat zatitan banatu. Laukitxo bakoitzean zenbaki bat jarriko dugu. Harria batera bota eta oin batekin saltoka ibilbide guztia egin behar dugu, harria duen laukitxo gainetik pasa barik.

ta eman behar zaio; umei erakutsi behar diegu diru gutxiagorekin jolastu daitekeela".

TALDE IZAERA BERRESKURATU

Arrasateko Txatxilipurdin ere lanean dihardute transmisioarekin. 2008ko bukaeran hizkuntza transmisioaren gaineko proiektua martxan jarri zutenetik, hainbat ekimen egin dituzte ludoteketan, familiak eta umeak elkarlanean horietan ibili daitezten; eta pasa berri den asteburuan aintzako jolasak kalera atera nahi izan zituzten. Egoitz Larrañagaren esanetan, "kalean presente ez dauden jolasak dira; gurasoek seme-alabei transmiti-

tzeko aukera izateaz gain, jolasterakoan talde izaera berreskuratu nahi izan da ostera ere".

EZ ZEKITEN TXAPETARA JOLASTEN

Unzuetak ere elkarlana nabarmendu nahi izan du. Gogorazi du jaialdian txapen tailerlean egon zela eta harriritu geratu zela inork ez zekiela jolastan: "Ez zituzten, gainera, ikusita. Umeak zoraturta ibili ziren jolasean. Tiragoman, berriz, guraso bat egon zen umei erakusten zelari egin behar zen. Horretarako, zapatu zaharrak ekarri zituen larru ateratzeko eta baita makila txikiak ere". Jaialdiak oso harrera ona izan zuen eta errepikatzeko asmotan daude.



> **TXAPAK.** Lehenik eta behin, botiletako txapak batuko ditugu eta nahi izanez gero, horiek apaindu. Jarraian, lasterketa egiteko ibilbide bat marraztuko dugu lurrean. Txapa hortik ateratzen bada, berriz hasierara jo beharko dugu. Helmugara lehena iristen dena irabazlea da.



HARIEN JOLASAK. Hari zati bat hartuko dugu eta hori lotuko dugu. Jarraian, eskuekin nahi dugun forma emango diogu. Aurkariak, atzamarak erabiliz, haria hartu eta beste irudi edo forma bat sortu beharko du bere eskuetan.

NINTENDO ETA FUTBOLA

Bestalde, egubakoitzean Eskoriatzan egin zituzten topaketetan ere ezin hobeto ibili ziren Debagoieneko eskoletako Lehen Hezkuntzako laugarren mailako neska-mutikoak. Goizean, taldeak egin eta hamar jolasez osatutako bi gune gertatu zituzten; tartean, goma, soka-saltoa, hariak, kromoak eta toka zeuden. Horietan antolatzaile lanetan ibilitako Beñardo Alberdik gogorarazi du orain dela hamar urte hasi zirela topaketak antolatzen, eta horien helburua dela jolas horiek ez ahaztea. Alberdiren esanetan, "Nintendoez eta futbolaz gain, betiko jolasak ere badaudela

gogorarazi nahi diegu umei. Txikitik horiekin jolasten genuen, eta baita gure gurasoek eta aitona-amonek ere".

OÑATIN, TXANTXIKU-JOKOA

Oñatin ere behin baino gehiagotan antolatu dituzte gisa honetako jolasak gaztelekuan: Txantxiku-jokoa, esaterako. Garai batean Euskal Herriko taberna eta txoko guztietan aurki genezakeen joko hori ere galtzen joan da eta orain berreskuratzeko ahaleginetan dabiltza. Gaztelekuko Kristina Valenen arabera, "barreak botatzeko, punteria frogatzeko eta lehia giroa sortzeko paregabea da Txantxiku-jokoa".

HIPOTEKA ZORUGABEA ETA GASTUGABEA



Ekarri zeure hipoteka kutxara.

Gastuak ordainduko dizkizugu, 1.000 €raino
eta Euribor + %0,40rainoko kuota ahal izango duzu lortu.
Eskura ezazu eskaintza honen baldintzei buruzko informazioa.

Baietz bizitza arrosa kolorez ikusi.

zer nahi duzu bihar?



> **PUNK JAIALDIA**
Oñatiko Errekalde auzoko jaietan, bost taldek jo zuten egubakoitzean > 30



> **EMON**
Bergarako taldeak jaietan aurkeztu zuen bere lan berria, txosnagunean > 31



> **BERGARA HIRIA**
Lehiaketara aurkeztutako 40 lan onenak Aroztegi aretoan daude ikusgai > 32

36KO GERRA > DOKUMENTALA

Aretxabaletako memoria historikoa berreskuratuz

ESPAINIAKO GERRA Memoria historikoa azaleratzeko, 36 eta 37ko gerran Aretxabaletan gertatutakoa jasoko du dokumental batek

GRABAKETAK Arrasaten bi pasarte filmatu dituzte; Intxortako trintxeretan eszena bat grabatzea ere gura dute

MAIDER ARREGI > ARETXABALETA
Guardia Zibilak eta militarrek Arrasateko Herriko Plaza eta Iturriotz kalea hartu zituzten. Sekulako ikusmina sortu zen herrian: dozenaka bizilagunek *Gerra zibila Aretxabaletan* dokumentala nola filmatzen zen ikusteko aukera izan zuten pasa den domekan. "Isilik, kamera, ekin!" zuzendariaren agindupean, Espainiako gerrako bi eszena grabatu zituen 20 lagunek lan taldeak. "Aretxabaletan 1936 eta 37an zer gertatu zen kontatzea du helburu dokumentalak", azaldu digu Juan Ramon Garai, Intxorta 1937 Kultur Elkarte kideak. Arteman Komunikazio enpresa eta Intxorta taldearen arteko elkarlana da. Gorka Etxabe, Artemaneko arduradunaren hitzetan, "asmoa da dauzkagun fikzio grabaketa historikoekin eta garai hartako lekukoek elkarriketekin doku-

mentala osatzea. Argazkiak eta elementu grafikoak ere erabiliko ditugu".

FRANKISTAK ARETXABALETAN
Gerra eta errepresioaren ondorioz, Aretxabaletan urtetan gordeta egon den historia azaleratu nahi dute. "Artemanekoekin bat egin eta letretatik irudira pasa gara. Benetan gertatutako historiaren bi pasarte grabatu ditugu. 1936an, urria eta azaroan, faxistek Aretxabaletan sartu eta pertsona zibilak atxilotu zituzten. Tartean, Bedoñako Elorrixa baserriko Dionisio Uribealago baserritarra. Orduan, Bedoña Aretxabaleta zen eta pentsatu genuen gertaera hori jasotzea dokumentalean. Arrasateko udaletxean zeuden ziegetara eraman zituzten atxilotuak, hori ere irudikatu dugu", azaldu digu Garai.

Grabaketetako bat Bidasoro baserrian egin dute. Izan ere, Elorrixa baserria guztiz herrituta dago egun; aldiz, Bidasorok orain dela 100 urte zeukan itxura berbera dauka. "Ama haurdun zegoela eta bederlatzi seme-alaben aurrean atxilotu zuten aita". Oso ondo gogoratzen du Jose Luis Uribealgok 1936an gertatu zena baserrian: "Lau urte terdi nituen baina guztia gogoratzen dut. Amak askotan kontatzen zidan eta, 18 urterekin, gertatutako guztia oroitu nuen bat-batean". Oso gogorra izan zela azaldu digu: "Kartzelan beldur handia pasa zuen aitak eta konfesatzen ere ez zioten utzi. Sorpresaz azaldu ziren frankistak eta aita eraman zuten ondoren fusilatzeke". Kandida, Dionisio Uribealgoren alaba, astoa hartu eta esnea saltzera Arrasatera jaisten zen. Herrian zegoela, bere aita preso, lotuta



Arrasateko filmaketan parte hartu zuten gazte batzuk, gustura. Jantziak eta materiala, Madrilen alokatutakoak dira. ARTEMAN



1939ko Ford kamioi gainean, Osoron Uribealgoren paperean. Autoa Maritxutako Komisiñuak erabiltzen duena da. ARTEMAN

ESANAK

"Ama haurdun zegoela eta bederlatzi seme-alaben aurrean, aita indarrez eraman zuten frankistek"

Joxe Uribealago > Lekukoa

"Hurbileko historia da eta generazio berriei jakinarazteko, azaleratzeko, proiektu polita da"

Jon Zubiaga > Aktorea

ikusitu zuen. Eszena hori ere jasotzen du dokumentalak. Lucio Oteizaren adierazpenak oso hunkigarriak dira. Oraindik ere malako ateratzen zaizkio hildako laguna gogoratzen duenean. Intxorta inguruan, bala galdu batek bete betean eman zion lagunari, eta Lucioen besoetan hilda erori zen.

GRABAKETAK IBARREAN

Mikel Arregi Arrasateko gaztetxe kidearendako sekulako esperientzia izan da: "Gaztetxeke 17 lagun batu ginen. Jolas baten moduan hartu genuen eta primeran pasa genuen". Arregik fran-

kisten jeneral nagusiaren papera egin du. "Sekula ez nuen pentsatuko nire burua horrelako jantzi baten barruan ikusiko nuenik; bitxia izan da *rol* hori betetzea, esperientzia polita benetan". 4 eta 13 urte bitarteko bederlatzi gaztetxo arrasatearrek ere hartu dute parte. Jantziak eta gerra materiala Madrilan alokatuta ekarri dituzte. Elgetan zabaldu den erakusketan dauden fusilak eta pistolak ere erabili dituzte. Gainera, Intxortan egin berri dituzten trintxerak aprobetxatuz, Murun gertatutako pasarte ere filmatuko dutela azaldu digu Etxabek.

Dionisio Uribealgoren papera, *Osoron*, Jon Zubiaga arrasatearrek egin du. "Erronka bat izan da; lehen aldia da horrelako paper gordina egiten dudana. Hurbileko historia da eta generazio berriei jakinarazteko proiektu polita. Oraindik erantzukizunak airean daude gainera. Joxe Uribealgoren begiradapean, errespetu handiz sartu naiz Dionisioaren paperean".

Dokumentala urri aldera aurkeztuko dute eta DVD formatuan ere zenbait kopia kaleratuko dituzte. Egindako lana aprobetxatuta, liburu bat ere kaleratuko dute Aretxabaletan.



Gurutz Garmendia, Bergaran duen dendan.

MIREIA BIKUÑA

Gurutz Garmendia > Baserriko produktuen saltzailea

"Nahiago dugu Murtziako edo Ukrainako produktuak erosi, baserrietakoak baino"

MIREIA BIKUÑA > BERGARA

Garmendia Ardoak dendako komertzial Gurutz Garmendiak baserriaren egoerari buruz egingo du berba zapatuan Bergarako Pol Pol tabernan, 12:00etan.

Baserriaren jatorriari eta egungo egoerari buruzko hitzaldia egingo duzu.

Bai, hala da. Alde batetik, nekazaritzaren eta abeltzaintzaren jatorriari buruz egingo dut berba. Power Point batekin 120 diapositiba erakutsiko ditut, jatorriari buruz. Kontatuko dut nekazaritza eta abeltzaintza nola heldu zen gure lurraldera. Era berean, erakutsiko dut nekazaritza askok uste dutena baino askoz zaharragoa dela. Guk 2.000 urteko datuak ditugu, baina orain dela 50.000 urtetik garatzen joan den lanbidea dela azalduko dut. Ez dago data zehatzik, baina ikerketek erakusten dute erromatarrek heldu aurretik nahiko garatutako herriak zeudela. Adibide moduan, Azkoitia eta Azpeitia arteko Muruaundi herria jartzen dute. Muruaundin auzotan antolatuta bizi ziren, gaur egun moduan.

Erakutsiko dut baserrietan nola bizi ziren eta nola bizi diren, eta zein produktu lantzen eta saltzen dituzten.

Zein da nekazaritzak egun bizi duen egoera?

Duda barik, gainbehera dator baserri mundua. Milaka urte

dituen kultura galtzeko arriskuan dago eta belaunaldi gazteek ez dute ezagutuko. Horren kontra egin behar dugu borroka.

Zer egin dezakegu baserri giroa ez desagertzeko?

Lan handia dugu aurretik. Inportanteena da baserriko produktuak erosten hastea. Merkataritzagune handietara joateko ohitura dugu, eta berdin zaigu Murtziako edo Ukrainako fruitak eta barazkiak erostea. Agian, gure etxearren ondoan kalitate oneko baserriko produktuak egiten dituzte. Hortik hasi behar dugu.

Gainera, Euskal Herritik kanporako produktuak erosten baditugu, dirua kanpora joango da. Garrantzitsua da norberak gasatzen duen dirua hemen gertatzea. Baserriarra, bere produktuak saltzearen jasotzen duen diruarekin, jatetxe batera afaltzera edo tabernara joango da.

"Duda barik, gainbehera dator baserri mundua, etxeko produktuak erosten hasi behar dugu"

"Baserriarrek bizi duten egoeraren aurrean erakunde gehienek duten jarrera lotsagarria da"

Bestalde, baserriarrei zuzenean erosten dizkiegun produktuak askoz osasuntsuagoak dira. Merkataritzaguneetan erosten ditugun tomateak edo arrautzak ez dira baserrikoak bezain goxak eta osasuntsuak. Etxeko ogia, piperrak, esparragoak, marmelada, ardoa, ukenduak...

Azkenik, hemengo produktuak kontsumituz gero, ingurumena babesten dugu, garraiorik ez dugulako behar.

Erosleek baserriarrek hartu-eman zuzena izatea inportantea da?

Bai. Baserriarrei zuzenean edo baserriko produktuak saltzen dituzten dendetan erosi daitezke. Horiek dira baserriarrei laguntzeko bideak.

Erakundeek ze jarrera dute egoera honen aurrean?

Lotsagarria. Erakunde gehienek merkataritzagune handiei ematen dizkiete dirulaguntzak. Baserriarrek dauden egoeran egotearen errudun nagusiak erakundeak dira, duda barik. Ez dituzte baserriko produktuak baloratzen. Ondorioz, ez dute neurririk hartzen.

Nortzuk gonbidatuko zenuke hitzaldira?

Batez ere, euskal kultura eta baserriko giroa eta bizimodua estimatzen dutenak gonbidatuko nituzke. Dena den, hitzaldia irekia da herritar guztiondako.

etxeko leihotik



Iker Barandiaran > 'ibarandiaran@goiena.com'

Gerrikoa estutzeko, aurretik jantzi behar

Ni bizi naizen etxeko balkoian jarrita irakurri nion Paris-ko 68ko maiatzeko iraultzako ideologo bati kapitalismoak azken aldirian erakutsi duen ahultasunaren aurrean, ezkerrek sistema iraultzeko urrezko aukera galdu duela. Gauza antzekoa kontatu zidan ekonomilari batek: hori galduta, ezkerrek dagoeneko ez daukala iparririk.

Kontuak kontu, gerrikoa gehiago estutu gura digute gobernuetatik. Aspaldi, orri hauetan idatzi nuen krisiaren hasiera euroak ekarri zuela edo, hobe esanda, euroaren *biribiltzeak*. Herritarren gastua izugarri handitu zen beste batzuk aberastu ziren bitartean eta gobernuak beste alde batera begiratu zuen axolagabeki. Atzetik kontsumoaren geldiuena, eta ondorioz krisia etorri zen.

Orain, beranduegi, gobernuak konturatu dira ekonomiak larri dabilzela eta, banku eta enpresa handiak -benetako errudunak- laguntzen dituzten bitartean, jende arrunta estutu gura dute. Nazka izugarria ematen dit izugarritzko irabaziak izaten jarraitzen duten enpresa handien agintariak politikarien ondoan ahalegin horiek txalotzen ikustea. Bitartean, EAEn egin gura dituzten megaproiektuak kolokan daude; bazen ordua. Zelan ulertu daiteke, beste premia asko egonda gainera, adibidez AHTk kostatuko duen dirutza gas-tatzeko prest egotea? Eta, polizian zein armamentuan gas-tatzen den guztia ez daukate murrizteko asmorik?

"Euroaren biribiltzearen aurrean, gobernuak ez ikusia egin zuen"

> Erretiratupei pentsioak murriztu gura dizkiete. Kontuz ibil daitezela. Aspaldi entzun nion Arrasateko erretiratu bati inoiz hauteskundeetara aurkeztuko direla; eta, badakizue, gure artean erretiratuak gero eta gehiago dira!

> Baserriar jantzeko ohitura ez daukagunok hori berreskuratu beharko genuke, eta gerrikoa jantzita, zergatik ez, gauzak diru barik, baina borondatez eta ahalegin sutsuarekin egin; horrela baka-rrik aterako ditugulako gure nahiak aurrera.

SEKTORE PUBLIKOA > GREBA DEIALDIA

Biharko zerbitzu minimoak zehaztu ditu Jaurlaritzak

GOIATZ ARANA > BERGARA

ELA, LAB, ESK eta ESTEE-EILAS sindikatuek greba deitu dute eta mobilizazioak iragarri dituzte biharko, maiatzak 25, sektore publikoan. Jose Luis Rodriguez Zapaterok eta Patxi Lopezek funtzionarioentzat iragarri dituzten soldata murrizketekiko ezadostasuna da arrazoia. Egoera horren aurrean eta gizartearentzako "ezinbestekoak" diren zerbitzuak bermatuko direla ziurtatzeko, Eusko Jaurlaritzak gutxieneko zerbitzuak ezarri ditu sektore ezberdinetan.

Ospitaleetan jaiegunitako zerbitzua eskainiko dute, lehen mailako arretan zapatutakoa eta larrialdietan ohikoa; horrez gain, atzeratu ezin diren dialisi eta tratamendu onkologikoak ere egingo dira. Eguneko zentroetan eta zahar etxeetan, langileen %50-60arekin jardungo dute. Hezkuntzan, haur eskolak eta ikastetxeak zabalduko dituzte. Titularitate publikoko garraio zerbitzuek lanegunitako ohiko zerbitzuaren %30 eskainiko dute. Larrialdi zerbitzuetan, jaiegunitan moduan egingo dute lan.

Abantailaz
betetako kluba!

Goiena
kluba

MAIATZEKO ZOZKETA

Telefonoa: 943 25 05 05
e-posta: kluba@goiena.com
Kuota: 45 euro



ARRIKRUTZERAKO BI SARRERA

Bidali KLUBA SARRERAK
[Bazkidearen zenbakia]
5195 zkra.



UMEENTZAKO LIBURUAK

Bidali KLUBA LIBURUAK
[Bazkidearen zenbakia]
5195 zkra.



ELHUYAR-EN PAMPINA ETA JOKUA


Bidali KLUBA PAMPINA
[Bazkidearen zenbakia]
5195 zkra.



elhuyar.org/zoozorora

SKUNK-FUNKEKO KAMISETA

Bidali KLUBA KAMISETA
[Bazkidearen zenbakia]
5195 zkra.



MUNDUMIRAKO MATERIALA

Bidali KLUBA MUNDUMIRA
[Bazkidearen zenbakia]
5195 zkra.



SARI NAGUSIA APIRILA-EKAINA

PARTE-HARTZAILE GUZTIEN ARTEAN ZOZKETATUKO DA
GAU 1 TXOPEBENTA LANDETXEAN



• Tel. 94 625 49 23 / 629 45 50 79
• Basetxeta Auzoa.
• Gautegiz-Arteaga (Bizkaia)
• www.nekatur.net/txohebenta
• www.toprural.com

Maiatzean 20 urte beteko ditugu;
Estatuko lehenengoak izan ginen.

SMSaren kostua: 0,15 euro + BEZA mezu bakoitzeko.
Indarrean dagoen LOPD 15/1999 legearen arabera, jakinarazten dizugu zure datu pertsonalak Goiena Komunikazio Zerbitzuaren fitxategi automatizatu baten sartuko direla. Datu-bilketa honen helburu bakarra da indarrean dagoen sustapena gestionatzea. Eskubidea izango duzu datuotari sartzeko, haiek zuzentzeko edo ezetzatzeko, helbide honetara idatzita: kluba@goiena.com



Eguenean Jose Mari Soroaren emanaldian jende asko bildu zen.

IRATI GALLASTEGI

NAGUSIAK > EGOITZETAKO JARDUERAK

Nagusien gaitasunak mantentzeko ekintzak

Aretxabaletako GSR zaharren egoitzan Jose Mari Soroa abeslaria izan da oraingo egunean

NEREA MENOR > ARETXABALETA
Momentuan 107 egoiliar daude Debagoiebeko GSR egoitzan, Aretxabaletan. Bertako nagusiak animatze aldera, ekintza asko antolatzen ditu egoitzako fisioterapia eta terapia okupazionalerako departamentuak. "Urte bete eskas darabagu lanean eta ekintzak ugartzea da gure asmoa: irteerak egitea, nagusiaren astea ospatzen hastea...", dio Irati Gallastegik departamentuko kideak.

SOROAREN EMANALDIA
Eguenean, Jose Mari Soroa abeslariaren bisita izan zuten Aretxabaletan. "Jende asko animatu

zen etortzera eta bertako egoiliarak oso gustura egon ziren. Denek hartu zuten parte eta arratsalde guztia abestu eta abestu igaro genuen. Egoiliarren fami-

liako asko ere animatu ziren emanaldira eta oso ondo pasa genuen guztiok", adierazi digute egoitzan.

Bide batez, eskerrak eman nahi dizkiete Nagusilaneke eta Pastoralerako boluntarioei euren laguntzarengatik.

GAITASUNAK MANTENDU

Astegunetan programazio finkoa dute egoitzan, "gimnasia, eskulana, bingoa... Astean behin ekintza bereziki prestatzen ditugu: aratustek, danborrada...". Ekintza hauek nagusien autoestimua hobetzen laguntzen dutela adierazi digute, baita memoria lantzen eta lasaitzen ere. Eguneroko ekintzetan partehartzeak euren gaitasunak mantentzeko eta hobetzeko balio dute.

ESANAK

"Egiten ditugun ekintzek nagusien autoestima eta memoria hobetzen laguntzen dute"

Irati Gallastegi > Terapeuta

ELKARTASUNA > SAHARAREN ALDEKO ELKARTEA

Maiatzak 20 sahararen aldeko elkarteak 'Oporrak Bakean' programan egingo du lan

Duela gutxi sortutako elkarteak 'Oporrak Bakean' programaren barnean dago eta Mundumiran izango da asteburuan

N.M. > BERGARA

Eguenean, Iraultza Sahararren urteurrenako ospakizunaren harira, saharar herriaren aldeko elkarte berri bat aurkeztu zen inguruko saharar herriaren aldeko elkarten artean. Maiatzak 20 izena du irabazi asmorik gabeko

elkarteak eta ingurukoekin batera arituko da hainbat ekintza antolatzen.

ATERPETXEAN

Proiektuaren oinarria *Oporrak Bakean* programa da. Harrera familiak beharrezkoak direla pentsatu arren, urtetik urtera hauen kopurua jaitsi dela uste du Maiatzak 20 taldeak eta ondorioz aterpetxeetara eraman nahi dituzte.

"7 eta 12 urte bitarteko haurrak saharar errefuxiatu kanpamentuetatik ateratzea da elkartearen helburua eta bide batez desertuan udako bi hilabete horietan pairatzen den temperatura altuetatik babestea. Gainera,


mediku errebisioak gauzatzen zaizkie eta oinarritzko arazoak konpontzeko bidean jarri", adierazi dute Maiatzak 20 taldeko kideek. Aurten, Brinkolako aterpetxean ostatu hartuko dute umeek, begirale saharar eta euskaldunekin.

MUNDUMIRAN

Aste bukaera honetan ospatuko den Mundumira jaialdian ere izango da taldea. Autofinantzazioa lortzeko bidean, Bertan, txapak jarriko dituzte salgai. "Txapak margarita bat du saharar banderarekin batera. Bakoitza 1.50 eurotan saltzen ditugu", adierazi dute.

EUSKAL HERRIA aurkezten du
aldizkariak

Mundumira



Antzuola - DEBAGOIENA

munduko kulturen festa

Malabarcirco, Tiritirantes, Oihulari Klown, azokak, umeen gunea,
herriko trikitixa eta txistulariak, mendi igoerak, diaporamak...



**OJOS
DE BRUJO** (Catalunya)
**GANGBÉ BRASS
BAND** (Benin)

GOSE (Eh)

THOMSO (Senegal)

KLAK!SON (Antzuola)

GIRASONS (Auditori de Barcelona)

TACUMAH REGGAE BAND (Eh)

BAIÃO BRASIL (Brasil)

RUMBA VELLA (Catalunya)

i 902 181 471

www.mundumirafesta.com

Euskadiko **BOULDER** Txapelketa

Antolatzaileak:

EUSKAL HERRIA

902 181 471
www.euskalherria-aldizkaria.com



DEBAGOIENEN MANKOMUNITATEA
TURISMO

Babesle nagusiak:



gozotueuskaltel.com



kutxa



Gipuzkoako Foru Aldundia
Diputación Foral de Gipuzkoa



m

Babesleak:



ekar



MONDAGÓN
UNIBERTSITATEA



Kolaboratzaileak:



Trazos kultura elkarte duela urte batzuk hasi zen Mexikorekin harremanak estutzen. Bertako musika taldeak Euskal Herrira ekarri eta hemengoak Mexikora eramaten ditu. Oraingoan, Mexikoko iraultzan izandako borrokalari ezagunen bilobak ekarri dituzte gurera. Urduñan izan ondoren Bergarako osoko bilkura aretoa erabat betetzea lortu dute.

Tomas Villa Cordova eta Isaias Manuel Manrique Zapata > Villa eta Zapataren bilobak

"Mexikarrok nondik gatozen eta nora goazen erabakitzekeo momentu ona da"

NEREA MENOR > BERGARA

Dagoeneko Mexikon izango dira Tomas Villa eta Isaias Manuel Manrique. Hala ere, Euskal Herrira egindako bisita kostata ahaztuko dute. Oso gustura egon dira gurean: jendearen harrera, pintxoak, bakailoa...

Nolako izan zen Mexikoko Iraultza?

1910. urtetik 1920 edo 1923. urtera izan zen. Baina nire ustez ez zen iraultza bakarria izan. Altxamendu armatu asko eman ziren eta guda zibila ere egon zen tartean. Garai horretan agintari asko egon ziren Mexikon: Porfelio Diaz, Madero, Huerta eta Carranza. Villa beste nagusi batzuekin batera Texatik sartuko da Mexikora eta Zapata hegoaldean arituko da borrokan. Nekazariendako lurra eskatzen zituzten biek, eta buruzagi batzuek hori agindu arren, batek ere ez zuen bete.


Eta iraultzaren ondorioak?

Mexikoko eskualdeetako buruzagi gehienak hil egin zituen Gobernuak eta gainerakoak sistema berak irentsi zituen. Mobilizatutako jende asko desmobilitatuta bukatu zuen borroka erdian zeudenean. Horregatik, porrota militarra eman zelan esan daiteke baina gauza asko lortu ziren. Boterearekin gelditu ziren gizonek ez zituzten lurra banatu nahi, ezta beraien berezko jabeen bueltatu ere. Hainbeste presioa izan zuten baina, azkenik lur-banatzeko hau egiteko agindua konstituzioan sartu zela. Konstituzio berri horretan borrokalariak eskatutako beste hainbat gauza ere lortu ziren: hezkuntza dohain eta laiko esaterako.

Baina arazoak daude: garai hartan ezarritako instituzio askok zailtasunak dituzte indarrean jarraitzeko.

Hala da, Indigenista Institutu Nazionala da honen adibideetako bat. Mexikoko kulturaren berpiztea ere eman zen. Sortu ziren garaian benetan ondo erabili genituen, Mexikorentzat paradigma berriak izan ziren. Oraindik instituzio hauek badaude baina gaur egun arazoak dituzte irauteko.

Mexikoko independentziak 200 urte bete ditu aurten eta Mexikoko iraultzak 100. Atzera begiratu eta egindako baloratzeko ordua da?



Isaias Manuel Manrique Zapata eta Tomas Villa Cordova, nor bere aitoren argazkiarekin.

NEREA MENOR

IRAULTZA

"Nekazariendako lurra eskatu zituzten Emiliano Zapata eta Pancho Villak"

Mexikarrok nondik gatozen eta nora goazen erabakitzekeo momentu onena dugu hau. Gure herriak oso egoera konplexua bizi du, iraultzak ate bat zabaldu zuen eta Pandoraren kutxa zegoen han. Hala ere, leiho bat ere zabaldu genuen, eta hortik gure herriarentzat nahi genuen etorkizuna ikusi genuen. Gure

IRAULTZAREN OSTEAN

"Porrota militarraz gain borrokalariak eskatutako gauza asko lortu ziren"

erronka nagusia atea ez baina leihoa zabaltean datza: ulertzeko, jarraitzeko, ekiditeko... Atzera begiratu, egondako kostu sozialetaz jabetuko gara. Iraganen egindakoaren gaineko gogoeta egin eta amildegitik behera berriz ere ez botatzeko egin beharrekoko zehaztu behar ditugu.

INDIGENAK

"Hidalgoko indigenen Otimi hizkuntzari euskararen antza hartzen diot"

Nor izan zen Pancho Villa?

Bitarteko apal eta xumeekin justizia herrikoien ordezkaria zen Villaren irudiarekin geratzen naiz ni. Gose den herriari jaten eman eta aldi berean armada oso bat mantentzeko gai zen. Hezkuntzaz maiteminduta zegoen, eskola asko eraiki zituen. Jeneral bati baino irakasle bati ordaintzea

nahiago dut, zioen, aurkako erregimeneko irakasleei ordaintzen zienean. Askotan, Gobernuak ez zien soldata ematen garaiko irakasleei (Gobernuak izan arren) eta halakoetan Villarengana jotzen zuten askok. Honek, irakasten jarraitu zezaten bere politzikotik ordaintzen zien.

Eta nor Emiliano Zapata?

Mexikok heroi asko izan ditu independentzia garaian, iraultzan... Baina kanpora joaten diren guztiek bat datoz Zapataren figura ezagunena dela esatean. NASAKoek badute Zapata izeneko ontzi bat, pentsa! Emiliano-ren gaineko liburu asko idatzi dira, abestiak ere bai, pelikulak; eta baita manifestazio asko egin ere. Alderdi politikoko gehienek bere irudia erabiltzen dute. Eta, zergatik? Bere ideiak hasieratik mantendu zituen, nekazaritza kontuetan beti finko jokatu zuen. Indioei kendutako lurrengatik borrokatu zen. Bere borroka osoan zehar lurra, dirua eta kargu publikoak eskaini zizkieten baina bere ez zen saldu. Bere buruarekin eta ingurukoekin izan zuen zintzotasuna asko baloratu du jendeak. Nire ustez, bere bizitza etengabeko borroka bat izan zen.

Indigenen aldeko Zapataren borroka eredu hartuz EZLN (Ejercito Zapatista de Liberacion Nacional) sortu zen Chiapasen. Zer deritzozu?

Bi borrokek antza dute gauza batzuetan eta beste batzuetan ez. Hasteko Zapataren borroka Moreloseko eskualdean izan zen eta EZLNrena Chiapasen. Mugimendua hasi zenean indigenen esku-bideen alde borrokatzen ziren, orain baina, politika orokorrean lan egiten dutela dirudi. Publikoki mugimendua indartsu dago. Abenduan izan nintzen azkeneko Chiapasen eta herritarren ustez Marcos Subkomandantearen berri izango dugu. Urte hasieran izango zela uste zen arren, agian data bereziren bat aukeratuko du.

Zein da indigenen egoera egun?

Etnia ezberdin asko daude Mexikon. Ni bizi naizen herritik gertu Tetelcingoak daude eta Nahatl hizkuntz hitz egiten dute, hau da herrialdean hedatuena. Hidalgo Otomi hizkuntza hitz egiten da, Mexikoko hizkuntza zaharrena da eta euskararen antza hartzen diot. Euskarazko hiztegi bat erosi dut, ea loturarik aurkitzen dugun!

Datuek dena diote.

GOIENKARIA

> 30.000 lagunek irakurtzen dute astero, papereko bigarren irakurriena baino 10.000 irakurle gehiagok.*

GOIENA TELEBISTA

> 8.000 lagunek ikusten dute egunero, iaz baino 2.000 lagun gehiagok.*

GOIENA.NET

> 2010eko lehen lau hilabeteetan 218.280 bisita izan ditu; iaz baino 67.077 bisita gehiago denbora-tarte berean. **

Eta guk gauza bakarra: eskerrik asko.

*CIEsek 2010eko lehen lau hilekoan egindako neurketa. ** Google Analytics-en bidez egindako neurketa.

kale inkesta

Udaberri hasiera petral xamarra izan da, baina eguraldi ona iritsi da. Aldarteak aldatu al dizu?



Kontxi Puertas
Langilea
Oñati

Eguraldi onaren beharra bazegoen. Udaberri ez du egin, eta zuzenean igaro gara negutik udara. Animoa ematen du eta gogo gehiago kale-irten edo mendian buelta bat emateko. Bazen garaia!



Migel Iñurritegi
Erretiratua
Oñati

Eguraldi ona beti da pozgarri. Baratzak ere esker-tzen du, tomateak indartu egiten baitira. Karakolak ezkutatu egiten dira, eta niri hezurak indartu egiten zaizkit. Jendea animosoago egoten da, gainera.



Ainhoa Briñas
Ikaslea
Oñati

Asko animatzen nau eguraldi honek, baina azterketak gainean ditut eta ezin izan dut askorik aprobetxatu, etxe alde-tik ibili naiz. Hondartzara joateko gogoia ematen du, baina datorren aste-an izan beharko du!



Mikel Aranburu
Langilea
Oñati

Aldarteak aldatzen dit, bai. Eguna hasteko beste indar bat ematen dit. Aktiboago nago gainera, eta jendea plan ezberdina egiteko prest egoten da, normalean baino gehiago. Behar handia zegoen, egia esan.

irakurlearen txokoa

943 25 05 05
goienkaria@goiena.com

BERGARA

> Agorrosineko igeriketa ikastaroetarako zozketekin kexu

Agorrosinen igeriketa ikastaroan semea duen ama batek deitu digu. Kexu da ikastaroan parte hartzeko urtero zozketa egiten delako, aurreko urtean parte hartu duen edo ez kontuan hartu gabe. Deitu digun emakumearen semeak, esaterako, orain bi urte ikastaroan esku hartu zuen, iaz kanpoan geratu zen eta aurten berriro hartu dute. Aurretik lortutako maila galdu du mutikoak eta berriro lehen mailatik hasi da. Haurrei jarraipena bermatzea eskatzen dute.

OÑATI

> Errekaldeko lanak jaiekin batera hastea ezinbestekoa zen?

Errekalde auzoko jaietan bertako bizilagun bat gerturatu zagu auzoa berritzeko astean abiarazi dituzten lanak beranduago hasterik ez al zegoen esanez: asteburu honetan bertako jaiak izan dira eta eraberritze lanek endredoak sortu dituzte, bere esanetan. Onartu du, hori bai, egin beharreko lanak direla.

DEBAGOIENA

> Betiko jolasak berreskuratzeko ekimenekin gustura

Azken denboraldian betiko jolasak gaur egungo haurrei erakusteko hainbat ekimen egin dituzte Arrasaten, Eskoriatzan eta Bergaran, besteak beste. Eskoriatzar batek deitu du ekimen hauek txalotzeko. Gaurko haurrek soilik bideo-jokoetan jolasten dakitela eta betiko jokoak galtzea pena litzatekeela kontatu digu.

ustek uste

Lander Muñagorri

Morboaren
lubakiak

Bimila ta zazpian Intxortako Atea inauguratu zutenetik, memoria historikoa berreskuratzeko pausu bat gehiago eman dute Elgetan. Izan ere, atzo inauguratu zuten *Gerra Zibila Euskal Herrian: ibilbide tematikoa Intxortaren magalean* proiektua.

Erakusketa batek eta herrigunetik Intxortarako ibilbideak osatzen dute proiektua. Bidean jarritako panel informatibok leku bakoitzak frentean izan zuen garrantzia azpimarratzen dute. Eta amaizteko: bisitarientzat beste ezer baino erakargarriago izan daitezkeen lubaki eraberrituak.

Inondik ere beharrezkoa da memoria historikoa berreskuratzea, urteetan zehar ahaztuak izan diren hildakoak gogora ekartzeko. Baina kontuz egin beharreko kontua da, morbosidade puntu bat baitauka hildakoak egon ziren lubakiak interesgune 'turistikoa' bezala erakusteko.

zorroztailea



Elena Laka

Bergara: jaietan jai

"Jaiei hasiera Bitorianatxok eta Antonio Irazolak emango diete. Irazolak jauretiko du txupinazoa eta gero jaitsiko da Bitorianatxo. Guztia prest dago gaur, egubakoitza, Pazkoei hasiera emateko.

Gainera, berrikuntza garrantzitsu batekin hasiko dira jaiak aurten."

Monika Belastegi

Goienkaria > 2010-05-21



Herriko jaietan murgiltzeak, krisiaren albisteengandik edo gatazka guztiengandik urrundu gaitu. Festaren izpiritua oasi (edo ispilukeria) bat sortu du, jai giroak zutabegilearen bihotza bigundu, eta behingoz bada ere, eztena gorde, eta zorroztailea limurtzaile bilakatu da. Jaietan dabilen herriaren omenez, hona hemen Bergaratik gustatzen zaizkidan hamar gauza:

1. Euskaraz bizi den herria izatea. Eskertzen dut kalean, dendetan, erakundeetan... euskaraz normal berba egitea, estimatzen dut gure semeak arlo denetan modu naturalean euskaraz haztea.
2. Zazpi-zortzi urteko ume bat herrian bakarrik ibili ahal izatea, bere autonomiaren eta gurasoen lasaitasunaren mesedetan.
3. Kalean, azokan, dendetan jendeak nire izenez agurtzea eta zer moduz nagoen galdetzea. Eta nik gauza berbera egitea.
4. Herrian bizi den musika zaletasuna, zenbat herritarrek hartzen duten parte musika-ekitaldietan, eta askotariko jendea izatea.
5. Elizkizunetako eta hiletamezetako musika, koroa eta organua. Santuseko *ossana* aurretik organuak jotzen duen akordea entzuteak soilik merezi du meza bat.
6. Nire ezkon familia osoak eskaini didan maitasun baldintzabakoa, gutxienez azken hirurehun urteotan Bergaran edo Antzuolan jaio ez den lehen famili kidea izanda ere. Eskerrik asko.
7. Santa Ana parkea. Maite dut txoko hori edozein urtarotan. Agintariren bati bertako elizan kristaldegi handiko kafetegi bat ipintzea otuko balitzaio, nire hiltarteko botua eskuratuko luke.
8. Zerbait urrun dagoela adierazteko erabiltzen den esamoldea: Pikunittan egon. Pikunitta Bergaran baina ia Aizpuru-txon dagoen baserria da, herri barruan baina azken mugetan.
9. San Martzial eguneko jaiak, Bergarako festarik onena zalan-tza barik. Dena gustatzen zait: idi pareak, ardo-barrikotea, erro-meria, lagunartea... Alaitasuna eta alkohola lagun, bergararren alderik dibertigarriena ateratzen da egun horretan.
10. Herriaren kokapena. *Bergaritis herritis* eraso zorrotz bat emanez gero, hiru ordu laurdenean hirian zaudelako.

Bergarar bizikideok, debagoiendarrok, pasaiuez ondo jaixak!

"Herriko jaietan,
zorroztailea
limurtzaile"

"Gustuko dut
herrian jendeak nire
izenez agurtzea"

Goienkaria

Argitaratzailea Goiena Komunikazio Zerbitzuak Kooperatiba Elkarteak • E05 Basabe Poligonoa • 20550 ARETXABALETA
Lehendakaria Estepan Plazaola Zuzendari nagusia Inazio Arregi

Zuzendaria Eneko Azkarate Erredaktore burua Monika Belastegi
Asteburuko erredakzioaren arduraduna Goliatz Arana Erredakzioa Arantzazu Ezkibel, Lander Muñagorri eta Larraitz Zeberio
Oinarriko diseinua Goio Arana Diseinu arduraduna Iñaki Iturbe Maketazioa Oxel Arrieta eta Imanol Soriano Publizitate
arduraduna Mireia Larrailaga Harpidetza eta banaketa Maria Leturia Administrazio arduraduna Agurtzane Gaintzarain

EGOITZA NAGUSIA

BERGARA 20570 Ibarra Kalea 6 • Tel.: 943 25 05 05 • Faxa: 943 25 05 00
Posta-e: goienkaria@goiena.com

ORDEZKARITZAK

ARRASATE 20500 Otarora Lizentziaduna 31 • 132 posta-kutxa • Tel.: 943 25 05 05 • Faxa: 943 25 05 00
Posta-e: arrasate@goiena.com

ARETXABALETA 20550 Durana 11 • Tel.: 943 79 86 21 • Faxa: 943 77 18 54
Posta-e: aretxabaleta@goiena.com

Publizitatea Aretxabaleta 20550 E05 Basabe Poligonoa • Tel.: 943 25 05 05 • Faxa: 943 25 05 09
Posta-e: publi@goiena.com

Harpidetza Aretxabaleta 20550 E05 Basabe Poligonoa • Tel.: 943 08 10 50 • Posta-e: harpidetza@goiena.com

Lege Gordailua: SS-0088/04 • ISSN: 1697 3542 • Tirada: 5.000 ale • Difusioa: 4.383 ale

Gipuzkoako Foru Aldundiak
diruz lagundutako aldizkaria

Gipuzkoako
Foru Aldundia



EUSKO JAURLARITZA
GOBIERNO VASCO

KULTURA SAILA
Hizkuntza Politikarako Sailburuordetza

Eusko Jaurlaritzako Kultura Sailak
diruz lagundutako aldizkaria

Herriak

Arrasate > 16 Bergara > 17 Oñati > 18 Aretxabaleta > 19 Eskoriatza > 19 Antzuola > 20 Aramaio > 20 Elgeta > 20 Leintz Gatzaga > 20



> **ARRASATE**
Udala pozik, hiri-gutunaren 750. urteurreneko hitzaldietako parte-hartzearekin > 16



> **ARETXABALETA**
Gazteen egitasmoak aurrera eramateko dirulaguntza deialdia egin du Udalak > 19



> **ARAMAIO**
Patxi Urbarren euskaltzain osoaren sarrera-ekitaldia, egubakoitzean > 20



Basagoitiko biaduktua Aretxabaleta eta Aramaio arteko errepidean, GI-3920 errepidean.

JOSETXO ARANTZABAL

ARETXABALETA > ERREPIDEAK

Udala eta Bidegi akordio batera iritsi dira hainbat konponketa egiteko

1,8 MILIOI EURO
AP-1 errepideko eraikuntza lanek eragindako kalteak konpontzeko

AKORDIOA
Aurreko astean lotu zuten akordioa Bidegi eta Aretxabaletako Udalak

LARRAITZ ZEBERIO > ARETXABALETA
"Akordio oso emankorra da, eta aspaldian espero genuena", esan du Aretxabaletako alkate Inaxio Garrok. "Orain badakigu Bidegi diru partida bat daukala Aretxabaletan AP-1 autobideko lanek eragindako kalteak konpontzeko". Aurreko astean bildu ziren Aretxabaletako ordezkariak Bidegi zuzendari Borja Jauregirekin batera. Adostutako neurriak hiru ataletan bereizi daitezke. Alde batetik, Bidegi bere aldetik burutuko dituen bi egitasmo: Basagoitiko bidezubiaren inguruan bata, eta Izurietako errepidean, bestea. Aurrekontu handiena, 736.000 eurokoa, Basagoitiko biaduktua eraikuntza dela eta Aretxabaleta eta Aramaio arteko GI-3920 errepidean sortutako kalteak konpontzeko lanek jasoko dute. "Errepidearen eta ubidearen trazatua

desbideratu ziren", dio Bidegi bidalitako oharrak. "Bere ingurumenaren berreskuratzea jorratu da orain, eta trazatu berria birgaituko da".

Izurietako bidea konpontzeko, berriz, 263.000 euroko diru partida agindu du Bidegi. Kasu honetan, oso kaltetua izan den zorua konponduko dute. "Lehiaketara

atera ditugu lanok, eta horrek bere prozedura du. Lanak ez dira hiruzpalau hilabete baino lehen hasiko", esan du Bidegi prentsa arduradun Oskar Rekaldek.

843.000 euroko balioa duen hitzarmena udalerrian hainbat konponketa egiteko

"Akordio horren barruan sartzen diren lanak honakoak dira", azaldu du Inaxio Garro alkateak. "Lausitako mendi magala konpontzea, Egileor eta Lausita baserrietako ur biltegiak berregitea, Ametsagako errepidea konpontzea, obrako hondakinak garbitzea, araka batzuk konpontzea, Egileor ingurua berreskuratzea eta Basagoitiko biaduktua inguruko hainbat soro garbitzea". Oroko bidea ere berreskuratuko dela esan du Garrok. "Guztiz baliogabetua gelditu zen AP-1 autobideko lanen ondorioz. Aretxabaleta eta Arrasate artean egiten ari diren biribilgunera izango du irteera berria". Urtebete da AP-1 autobidea zabaldu zutela, baina eragindako apurketak handiak izan dira. Aretxabaletako eta Bidegi ordezkariak behin baino gehiagotan bildu dira akordio batera iristeko.

UDALAK BULTZATUKO DITUENAK

Horrekin batera, Bidegi 843.000 euroko balioa duen lankidetzaren hitzarmena sinatuko du Aretxabaletako Udalarekin AP-1 autobideko lanek udalerrian eragindako kalteak konpontzeko. "Hitzarmen horretan jasotakoak Aretxabaletako Udalak aterako ditu lehiaketara", azaldu du Garrok. "Hau da: dirua aurreratu beharko dugu, baina faktura horiek Bidegi bidaliko ditugu gero". Lanen zerrenda luzea da eta Garrok esan du Udalak ezingo dituela guztiak batera egin. Esan du astean bertan batuko direla lehentasunak finkatzeko.

BERGARA > PAZKOAK

Egunez eta kalean egin dute festa gehienbat bergararrek

Tenperatura altuak eta kaleko giroa izan dira Pazko jaietako lehen txanpako ezaugarri nagusiak

Gaur, Koadrilen Eguna, egun handia da Bergaran eta bihar, nagusien eta umeen txanda izango da

LARRAITZ ZEBERIO > BERGARA

Festa giroan eta aparteko ezuste barik ospatu dituzte Bergaran aste bukaerarako iragarrita zituzten 44 ekitaldiak. Guztiak burutu direla konfirmatu dio GOIENKARIA-ri Kultura zinegotzi Enara Minguezek. Eguraldia lagun izan dute bergararrek, zenbait unetan larregiko beroa ere bai, eta horrek jendea kalean festa egitera animatu du. Hiru egunotan umore onez eta festarako gogoz ikusi ditugu bergararrak.

PARTE-HARTZE HANDIA

San Martin plazan, txosnagunean edo Matxiategin, jende andana ibili da kalean eta ekitaldi

gehienek herritarren erantzuna izan dute, parte-hartzaile moduan dela edo ikusle gisa. Eguraldiak asko lagundu du horretan, baita gertatutako eskaintza zabalak ere. Adin guztietako jendea ikusi dugu kalean, eta berandura arte ibili dira jaigiroan.

KRISIAREN ERAGINA

Barraketan eta gaueko giroan nabaritu da akaso gehien azken boladan denon ahotan den krisiaren eragina. Barraketako zenbait arduraduni galdetuta, esan digute jaietako lehen egunotan aurreko urteetan baino mugimendu txikiagoa sumatu dutela, eta espero dute gelditzen diren bi egunotan jendea gehiago animatzea. Gaueko ordu txikietan ere gero eta jende gutxiago ibiltzen dela jaso dugu. Egubakoitz gauean nabaritu dute, batez ere, beherakada tabernariak. "Azken urteotako dinamika dela esango nuke", adierazi du Minguez zinegotziak.

APARKATZEKO, NAHIKO ONDO

Jai egunotarako eta aparkaleku arazoei aurre egiteko, hainbat neurri hartu ditu aurtengo Udalak. Eraginkorrak izan direla esan daiteke. "Aparkatze, egia esan, arazo gutxi izan ditut aurtengoan", adierazi digu jaietan atzera eta aurrera ibili den elgetar batek.

Udaltzaingotik, hori bai, jakinarazi digute lan gehien, egunotan, gaizki aparkatutako autoek eman dietela, baina arazo ohikoa dela.

EKITALDI JENDETSUAK

Jende mugimendu gehien izan duten ekitaldien artean bat baino gehiago nabarmendu daitezke: Bitorianatxoren jaitsiera, musika bandaren kontzertuak, han eta hemen antolatutako bestelako kontzertuak, plastika lehiaketa, kalejirak, errekoradore ikuskizunak, umeen jolasak, dantza askatuko lehiaketa...

Aurtengo berrikuntzen artean, berriz, esan beharra dago hamar izan direla goitibehera lehiaketan parte hartu duten taldeak. Eta atzo, domeka, lehengo aldiz egindako baltsa jaitsieran hiru koadrilak hartu zuten parte.

GAUR, KOADRILEN EGUNA

Jaietako ekuadorrean, Koadrilen Eguna ospatuko dute gaur Bergaran. Egun handia dute, blusak jantzi eta kalera irteteko aukera paregabea. Urtetik urtera, gero eta bergarar gehiago joaten da bazkari horretara, eta aurtengoan hiru koadrilak hartu dituzte parte. Aurreikuspena da bazkari horretan 750 lagun elkartzea.



Jaietako lehen ekitaldia, egubakoitzeko Bitorianatxoren jaitsiera, jendetsuenetarikoa izan zen.



Xaxau-ren jaitsiera.



Atzoko apar festa Munibe plazan.

PROTAGONISTEKIN BERBETAN



Maria Teresa Bruña eta Begoña Ugarte
Bergara

Bakailao lehiaketako kazuei erreposoa egiten harrapatu genituen zapatu eguerdian San Martin plazan. "Badaude bi zoragarri daudenak, oso presentzia onekoak", esan zigun Begoñak.

Biak ala biak, baina, kazuela batekin zalantzatan zeuden. Besteekin alderatuta kolore zuriagoa zeukan. "Akaso, esne-gaina bota diote!".



Jose Miguel Lazkano eta Jose Mari Etxeberria
Bergara

Bakailao kazuela epaimahaiko kideen eskuetan laga eta gero hitzegin genuen bikote honekin. Egindako lanarekin gustura gelditu zirela esan ziguten. "Orain, epaimahaikoei agintzen dute", adierazi zuten. Pozik zeuden aurtengoan hiru bikote gazte hartu dutelako parte lehiaketan. "Guk urte batzuk baditugu, eta atzetik jendeak etorri behar du".



Iñigo Almortza eta semea
Bergara

"Sekulako maila egon da errekoradoreen txapelketan", esan zigun zapatuko ikuskizuna amaitutakoan. "Nagusiak ondo ibili dira, eta gaztetxoak zer esanik ez. Ikusten ari gara errekoradore eskola bere fruituak ematen ari dela eta pozik gaude". Zezen beltzarekin izandako ezusteari buruz esan zigun horrelakoetara ohituta daudela. "Jendea aldatu egiten da, baina zezen horrek bere ikuskizuna eman du".



Atzoko baltsa jaitsieran parte hartu zuten hiru taldeetako bat.



Udal musika bandaren saioa, Espoloian.



Imanol Diez errektorea.



Zapatuko plastika lehiaketan parte hartu zuen neska-mutiko taldea.



Barrakak, Matxiategin.

ARGAZKIAK: JOSETXO ARANTZABAL

PROTAGONISTEKIN BERBETAN



Oihan Vega
Bergara

Zapatuan, erraldioen konpartsa-
ren kalejira harrapatu
genuen. "Eguraldi ona eta
egundoko giroa kalean! Horixe
da gehien gustatzen zaidana;
herriko jendea kalean eta
umore onean ikustea".



Marina Iturriaga
Bergara

Errektadoreen txapelketa
ikusten izan zen. "Gustatzen
zait ikuskizuna, arratsalde
pasa egiteko modu ona da".
Jaiak festa egiteko aprobetxa-
tuko zituela esan zigun.
"Denetik egitea da asmoa".



Blas Cruz
Arrasate

Bigarren egin du errektadore
txapelketan. "Arratsalde polita
izan da. Jende asko etorri da
gu ikustera eta ikuskizun polita
eskaini dugula uste dut. Umeak
ere oso ondo aritu dira. Pozik
egoteko moduan gaude!".



Imanol Diez
Oion

Errektadore txapelketan
nagusitu zen Diez zapatuan.
"Lehen aldia da lehenengo sari
bat eskuratzen dudala. Oso
pozik nago. Ordu eta erdiko
bidaia egin dut hemen egoteko
eta merezi izan du!



Ane eta Maialen
Arrasate eta Donostia

Bergarako jaietan primerako giroa egoten dela
uste dute bi neska gazte hauek. "Ondo pasatzera
etorri gara asko gustatzen zaizkigu-eta Bergara-
ko Pazkoak". Anek Donostiako Maialen ekarri du
Bergarako jaietara. "Kalean, Donostiako jaietan
baino giro hobea dago hemen", dio Maialenek.
"Oso gustura nabil".



> BAKAILAO LEHIAKETA

Zapatuan bakailao lehiaketaren 28. edizioa egin zuten San Martin plazan, eta herriko hamar elkarte gastronomikoetako ordezkariak hartu zuten parte; Basalgo, San Juan, Sagarpe, Azkagain, Gorla, Pertxa elkarteak, Hermandad Pertxa, Madura, Jaolatza eta Muriondo elkarteak, hain zuzen ere.

Lapiko eta amantal artean lanpetuta ibili ziren. Lehenengo saria Uberara joan da aurten; Jaolatza elkarteak Ander Markiegik eta Maria Jose Apalategik eraman dute.



> DANTZA ASKATUKO TXAPELKETA

16 urtetik beherako 23 bikotek hartu zuten parte atzo San Martin plazan jokaturako dantza askatuko txapelketa; bergarako bi bikote tartean. Lehenengo saria Errenteriarra joan da aurten: 15 eta 13 urteko Aitor eta Uxue Arrieta anai-arrebek eraman zuten. Bigarren saria Azpeitiko Amets Amubietak eta Maialen Aldalurrek jaso zuten, eta hirugarrena Lezo-Billabonako Iker Sanzek eta Lierni Kamiok. Plazan ikusle asko elkartu ziren. Eserleku guztiak bete ziren eta jendeak zutik jarraitu zuen lehia.

Egitaraua

Astelehena, 24, Koadrilen Eguna

11:30 Koadrilen arteko HERRI KIROLEN TXAPELKETA. Zezen-plazan izango da txapelketa, Xapre eta Zarra trikitilariak eta Incansables txarangak alaituta.

12:30 DANTZALDIA Fabulosa orkestrarekin, Espoloian.

14:30 HERRI BAZKARIA. San Martin plazan izango da. Gero eta jende gehiago joaten da bazkari horretara eta aurten 750 txartel ipini dituzte salgai, iaz baino 200 gehiago. Euria egiten badu, Labegarrietako kiroldegian izango da bazkaria. Incansables txarangak ipiniko du musika. Segidan, koadrilen arteko jolasak izango dira, eta karaokea ere, DJ Angierekin.

18:30 ERREKORTADOREEN ESKOLA IBILTARIA. Zezentxoekin, zaleendako. Zezen-plazan.

19:00 KALEJIRA Incansables txarangarekin San Martin plazatik hasita.

19:00 KONTZERTUAK Extorsion eta Xero Xete taldeak. Txosnagunean.

19:30 BERGARA HIRIA PILOTA FINALAK. Maila handiko partidua ikusteko aukera dute zaleek: Irujo eta Laskurain, Titin eta Pascualen aurka. Pilotalekuan.

20:00 ERROMERIA. Erdizka Lauetan taldearekin. San Martin plazan.

22:30 KONTZERTUAK. Latz eta Inger, lehenengo; Fiachras gero; eta, bukatzeko, Des-kontrol.

23:00 CAMP DANTZALDIA. Fabulosa taldearekin, Espoloian.

23:00 DANTZALDIA. Amaiur taldearekin. San Martin plazan.

05:00 KARAOKEA. Txosnagunean Karaokea, eta kulero eta galtzontzilo lasterketa.

Martitzena, 25 Nagusien eta Umeen Eguna

09:00 BIGANTXAK Zezen-plazan.

11:00 UMEENDAKO JOLASPARKEA.

Ipintza II-ko patioan, 11:00etatik 14:00etara. Auto txikiak, zezen mugikorak, goming...

12:00 HERRI KIROLEN ERAKUSTALDIA. San Martin plazan. Honako partaideekin:

Ioritz Gisasola (Zelai III.a) eta Jon Gisasola (Zelai IV.a) eta Hodei Ezpeleta aizkolariak; eta Joseba Ostolaza, Ureta eta Idoia Etxeberria harri-jasotzaileak. Aurkezlea da Ernesto Ezpeleta, *Bihurri*.

12:30 MUSIKA. Duo Plaentxi taldearen emanaldia. Domingo Irala kalean, 12:30etik 14:00etara.

16:30 UMEENDAKO JOLASPARKEA. Ipintza II-ko patioan, 16:30etik 19:30era.

17:00 PILOTA. Eskuz banakako profesional mailako

pilota partidua, Udal pilotalekuan.

18:30 ERREKORTADORE ESKOLA. Zezentxoekin ikuskizuna. Zezen-plazan. Incansables txarangak alaituta.

18:30 Debagoieneko V. JARDUNALDI GASTRONOMIKOEN AURKEZPENA. San Martin plazan.

18:30 PINTXO ETA ARGAZKI LEHIAKETAK. Txosnagunean.

19:30 UMEENDAKO KARAOKEA. Txatxilipurdi elkarteak antolatuta. 19:30etik 21:00etara.

20:00 LEHIAKETATAKO SARI BANAKETA. Txosnagunean.

22:30 DJ FESTA.

DJ Oihan Vegak ipiniko du musika. Emanaldia, gauerdia arte. San Martin plazan.

00:00 BITORIANATXOREN IGOERA. Jaiak bukatzeko. Incansables txarangak musika ipiniko du. San Martin plazan.

00:30 DJ FESTA. DJ Oihan Vegaren eskutik. San Martin plazan, 00:30etik 02:00etara.

ZIRKULAZIO ALDAKETAK

Herri barruko zirkulazio aldaketak eguaztenera arte

Egunotan Bergaran autoz sartzeko asmoa baduzue, ez ahaztu jaiak amaitu bitartean hainbat aldaketa daudela herri barruan. Kanposanto ondoko aparkalekuan barrakak ipini dituzte, eta Bideberrin, berriz, txosnagunea. Bi leku horietan ezin da autoa aparkatu. San Martin herri eskolak eta Aranzadi ikastolak poligonoan dituzten patioetan, aldiz, 100 aparkaleku baino gehiago daude.

Herri barruko zirkulazioari dagokionez, gogoratu Bideberri moztuta dagoela, eta txosnagunearen ondorioz Kruz Gallastegi kale osoa itxita dagoela. Lehen taxien geralekua zegoen kaletik jaitsi eta duela gutxi egin duten Bideberri ondoko bidegurutzetik igaro beharko dute autoek. Alde zaharrean, San Martin plaza inguruan ere aldatu egin da zirkulazioa, aste bukaeratan egoten den bezala dago. San Pedro kalea, Komenio kalea eta Bidekurtzeta ahalik eta gutxien erabiltzea eskatu dute.

HERRI BAZKARIA

Udal langileen lana errespetatzeko eskatu dute

Pazkoetako lehenengo asaltoaren ostean, Koadrilen Eguna ospatuko dute gaur Bergaran; eta Nagusien eta Umeen Eguna, berriz, bihar. Jaiak ez dira, beraz, Bitorianatxoren igoerara arte ofizialki amaituko.

Gaurko ekitaldi nagusien artean herri bazkaria nabarmentzen da. 750 lagun espero dituzte San Martin plazan egingo den koadrilen arteko bazkari horretan. Udaleko Kultura sailetik eskatu dute goizean zehar langileen lana errespetatzeko. Bazkarirako guztia prest egon dadin mahaiak, aulkiak eta abar ipini behar dituzte, eta bitarte horretan langileek egin beharreko prestaketa lanak ez oztopatzeko eskatzen dute Udaletik. Jende asko batzen da eta lanak zaildu egiten dira, sarri.

Incansables txarangak alaituko du bazkaria, eta ostean koadrilen arteko jolasak eta karaokea izango dira DJ Angierekin.



Helduek hiru buelta eman zizkioten ibilbideari.

JOSETXO ARANTZABAL

ARETXABALETA > ELKARTASUNA

Sahararen aldeko krosak kolorez jantzi du herria

Aretxabaletarrak eurak izan dira azkarrenak: Beñat Armendia eta Josu Aizpurua

GOIATZ ARANA > ARETXABALETA

Parte-hartzaile kopuru xumea izan du aurtengo Are-Krosak: 16 lagunek parte hartu dute helduetan; eta, 10 inguruk, haurretan. Herriko Iesbaa taldeak antolatzen du krosa, herri sahararraren alde, eta aurtengoa hirugarren edizioa izan da.

10:30ean hasita eta udaletxe paretik abiatuta, herriko plaza, Errekabarren kalea, Andramari

auzunea, Mitarte kalea, Santa Kurtz kalea eta Otorra kalea zeharkatu zituzten parte-hartzaileek, atzera ere herriko plazara bueltatzeko. Ibilbide hori hiru bider egin zuten helduek -4.500 metro inguru, orotara-, aldiz, haur eta gazteek ibilbide motzagoa egin zuten. Aretxabaletako lasterkariak ez zik, Arrasate, Bergara eta Hernanikoak ere bazeuden, baina herri bertakoak izan ziren azka-

rrenak: Beñat Armendia helduetan, eta Josu Aizpurua haurretan.

HELBURUAK

Herritarrek, takarradan eginez, sahararren eskubideak aldarrikatu zituzten atzo, beste behin; eta diruz ere lagundu zieten, lasterkariak eta beste hainbat eta, hainbat lagunek erositako dortsalekin ateratako dirua -hiru euro, dortsal bakoitzeko-, Saharako herriari laguntzera bideratuko delako.

Iesbaa elkartetik datorren urterako deia egin dute.



ANE JAUREGI

'Txominen txapela' janztea balute...

Errepikatzen modukoa izan da aurtengo Txomin Txapel eguna -Huheziko festa-. Goizean, askotariko probak egin zituzten olinpiadetan -koxkola apustua zurito eta *morenitoekin*, adibidez-; eguerdian trikiptotea eta 250 laguneko bazkaria; Gaztelumendi anaiek bertsotan egin zuten ostein eta gaueko kontzertuekin goialdera arte luzatu zen festa jendetsua.

ARAMAIO > KURTZO AMAIERAKO JAIA

80 familia baino gehiago herri eskolako festan

Arratsaldean askotariko tailerrak eta jokoak egin zituzten; gero, afari-merienda eta erromeria

G.A. > ARAMAIO

"Parranda" egin zuten Aramaio-ko San Martin Herri Eskolako haur eta gurasoek zapatuan: ikasturte amaierako festan murgilduta ibili ziren arratsaldetik gauerdia arte. Pozik kontatu zizkiguten atzo bezperako kontuak primeran pasa zutelako, eguraldiak lagundu zuelako eta parte-hartze handia izan zelako -85 familia inguru batu ziren-.

Gurasoek antolatutako tailerrek hasi zuten festa: graffiti tailerrean, paisaia erraldoi bat margotu zuten horma baten; ponpa erraldoiak egiten ikasi zuten; koloretako aho-zapiekin egindako bolekin koloretako lore

handi bat osatu zuten, *collage* moduan; arroza, alpiste eta globoekin egindako pilotekin malabareak egin zituzten; eta makillaje tailerrean, apain-apain jarri ziren. Tailerrekin bukatutakoan, guztiek parte hartzeko moduko jokoak egin zituzten, argazkiko aulki-jokoa, esaterako.

AFARI-MERIENDA ETA ERROMERIA

Ikastetxeko jangelan afari-merienda egin zuten gero, herri bertako sagardo, sagar-zuku eta ogiarekin, eta familia bakoitzak etxetik eramandako jakiekin. Gurasoetako batek DJ lanak egin zituen eta, hala, punta-puntako erromeria izan zuten.




Neska-mutikoak, aulki-jokoan.

HERRI ESKOLA

200 lagun zerura begira Aretxabaletan

Laino bakar bat ere ez begi bistan, lau teleskopio eta 200 lagun zerura begira; horixe, egubakoitz gauean Aretxabaletako plazan jaso zitekeen irudia. Loramendi euskara elkarteak eta Ilatargi astronomia taldeak antolatu zuten ekimena, eta arrakasta izan zuen.

Plazako argiak itzalita, handik bertatik hainbat konstelazio ikusi zituzten; eta, teleskopiotik begiratuta, baita ilargia eta Saturno planeta ere, eraztun eta guzti. Harrituta zeuden herritarrek; euren aurpegiek sorpresa erakusten zuten ikusitakoak ikusita.



ILATARGI

HISTORIA > ARRASATEKO HIRI-GUTUNAREN 750. URTEURRENA

Hitzaldien parte-hartze altua dela-eta, oso pozik dago Udala

Hitzaldi guztiek interes handia piztu dutela dio Oihana Aranburu Kultura zinegotziak; Arrasateko historian sakontzen jarraituko du Udalak

JOKIN BEREZIARTUA > ARRASATE

"Herritarrek sekulako interesa azaldu dute, hitzaldien parte-hartzean garbi azaldu da". Oihana Aranburu Kultura zinegotziaren hitzak dira, eta 750. urteurreneko hitzaldi zikloaren erantzunaz Udala pozik dagoela adierazten dute. Aranburuk gaineratu du "gure herriari buruzko informazio historiko gehiago" ematea zela helburua eta, dioenez, "ahalbidetu da". Hitzaldiak euren artean "oso ezberdinak" izan dira, eta Aitzol Altunak eskaini zuen *1200. Lurraldetasunaren galera* nabarmendu du zinegotziak: "Hainbat

Toti Martínez de Lezearen *1448ko Arrasateko erreketak* hitzaldian Kulturateko areto nagusian ez zen eserleku liberrik geratu. J.B.

argipen eman zituen, euskaldunontzat ezkutuan egon direnak". Toti Martínez de Lezeak ere Kulturate lepo bete zuen.

SAKONTZEN JARRAITZEKO ASMOA Arrakasta ikusita, herriko historian sakontzen segitzeko asmoa du Udalak: "Ekitaldien berri ematen

joango gara baina gaurtik gonbidapena luzatzen dugu". Beste herrietako esperientziak eta herritarren ekarpenak izan ziren Uda-

Bisita gidatua alde zaharrean zehar

Hiri-gutunaren 750. urteurrenaren harira, Helduen Heziketa Iraunkorrerako zentroak (HHI-EPA) bisita gidatua antolatzen duen herriko kaleetan zehar, joan den eguen arratsaldean. Ana Isabel Ugalde historialariak gidatu zuen bisita, eta 30 herritar inguruk hartu zuten parte. Ugaldek hamaika xehetasun eman zituen Arrasateko historiaren inguruan, leku bereziak abiapuntu hartuta. Hala, eguraldi atsegina lagun, gure ondare historikoa ezagutzeko aukera izan zuten parte hartzaileek.



Bisita, herriko plazara heldu zenean. J.B.

laren abiapuntuak hitzaldiak antolatzerakoan: "Dinamika aberasgarria izan da, etorkizunean indartu beharrekoa", dio Aranburuk.

Iraitz Etxaburu > Bertso guneko kidea

"Ekimen erabat parte-hartzailea izatea da garrantzitsuen"

J.B. > ARRASATE

Bertso eskola deitza "serioegia" ei denez, Bertso gunea deitu diote herriko zenbait bertsozalek abiarazi berri duten ekimenari. Horrek ez du esan nahi ekimenak seriotasunik ez duenik, baina gune erabat parte-hartzailea izatea da gura dutena. Iraitz Etxaburu (Arrasate, 1985) taldeko kidearekin egon gara.

Nola jaio zitzaizuen Bertso gunea sortzeko ideia?

Lehen Arrasaten bazegoen Bertso eskola baina desagertu egin zen, eta bizitasuna eman nahi diogu bertsozaintzari. Oñatiko bertso eskolako kide naiz eta gure herrian zerbait sortu behar zela pentsatu nuen. Hala, lagun batekin batera Bertso gunea abiarazi genuen.

Nola joan zen lehen eguna?

Ondo. Lehen klasera bost pertsona agertu ziren eta bigarrenera zazpi. Ekimenarekin hasteko moduko taldea sortu dugu.

Non eta noiz elkartzen zarete?

Egubakoitzero elkartzen gara gaztetxeko liburutegian,



Etxaburu, bertsozaintzarako gonbita egiten.

"Herriko Bertso eskola desagertu egin zen; guk bizitasuna eman nahi diogu bertsozaintzari"

20:30ean, eta saioaren arabera izaten da iraupena. Hau da, gurtura bagaude, gaua ondo sartu arte egon gaitezke.

Zein da bertsozaintza irakasteko metodoa?

Bizitzako beste hainbat gauzen antzera, egiten ikasten da. Doinuak ikastea garrantzitsua da; hainbat doinu ditugu eta abesten zoazen heinean, barneratzen joaten zara. Errimegi dagoenez, trikimailuak ikasten ditugu. Baina gakoa da behin eta berriz lantzea.

Bestalde, Bertso gunea ekimen erabat parte-hartzailea izatea da garrantzitsuen guretzat, ez dago ikasle eta irakaslerik.

Aurreikusitako jendaurrean saioaren bat egitea?

Gaztetxeak baldintza bakarra jarri zigun Bertso gunea bertan egiteko: noizean behin jendaurrean bertso saioaren bat egitea. Oraindik, baina, hasiberriak gara eta denbora dezente pasa behar da horretarako. Agian, abenduaren 24an, Eguberriko jaialdian zerbait egin daiteke...

Zerbait gaineratzerik nahi?

Jendea animatzen dugu parte hartzera; bertan afaltzeko aukera izan ohi da, gainera.

txaloak eta txistuak



GOIENKARIA

Aparkalekua noiz kenduko zain, frontoia erabiltzeko



Santa Teresa auzoko birmoldaketako obretan, frontoia behin-behinerako aparkaleku moduan erabiltzea onartu zuela Udalak. Hala ere, Obenerreka auzoko hainbat herritar kezu dira: "Obrak aspaldi amaitu dira, eta frontoia parkinga izaten jarraitzen du", diote. Bada, Udalarari eskatu diote frontoia ahalik eta lasterren erreuperatzeko.

> ZERBITZUAK

Udal langileek bat egin dute sindikatuen greba deialdiarekin, Zapateroren neurrien aurka

Udal langileek batzarra egin zuten egubakoitzean, Jose Luis Rodríguez Zapaterok iragarri dituen krisiari aurre egiteko neurrien kontra -funtzionarioei soldata %5 murriztea, esaterako-sindikatuak biharko deitu duten grebaren gainean bozketa egiteko. Parte-hartzea inoiz baino altuagoa izan eta, eta baiezkoak irabazi zuen, argi eta garbi: 92 boto alde eta sei kontra.



Olinpiadetako gaztetxoak Muniheko karpan ere lehiatu dira eguraldi txarra egin duenean.

JARDUN ELKARTEA

EUSKARA > JARDUN ELKARTEA

Albondiga Erreak taldea irabazle Jardunen olinpiadetan

Aurten 60 bat neska-mutiko ibili dira eta irabazleak Arcachongo aquaparkera joango dira

MONIKA BELASTEGI > BERGARA

Jardun euskara elkarteak antolatutako olinpiadak bukatu berri dira eta irabazleak Albondiga Erreak taldeko kideak izan dira.

Laugarren, bosgarren eta seigarren mailetako neska-mutikoei hartu dute parte olinpiadetan, zortzi taldetan banatuta -60 bat gaztetxo-, eta primeran pasa dute.

Lau zapatutan barrena aritu dira lehian eta askotariko probak egin dituzte: herri kirolak, boloak, toka eta igela, igeri-

lekuko probak eta Jarduntxoren jolasa.

Bada, talde bakoitzak zapaturo jasotako puntuazioa zenbaitu eta gero, Albondiga Erreak taldeak batu ditu gehien, eta, ondorioz, haiek izan dira aurtengo edizioako irabazleak.

Hori horrela, Jardunetik aurreratu dutenez, irabazitako saria egun bateko irteera da. Hain justu ere, Arcachongo aquaparkera joango dira uztailearen 7an.

BERTSO-IKUSKIZUNA EKAINEAN

Bestalde, Jardunek ikuskizuna antolatu du ekainaren 4rako. *Mende baten aldarriak hogeigarrenean jarriak* delako bertso-ikuskitzuna egingo dute Jon Maia eta Xabier Amuritza bertsolariak. 22:00etan izango da, Zabalotegi aretoan, eta ez da sarrerarik ordaindu beharrik egongo.

Ikuskizun horretan, XIX. mende bukaerako eta XX. mendeko gertakizunak kontatuko dituzte Maiak eta Amuritza, garaiko bertsolariak jarritako bertsoen bidez. Batik bat, orduko egoera politikoa eta soziala arituko dira.

EUSKARA > UEMA

Herrien arteko Xiba jokoetan izena emateko epea zabalik

Ekainaren 12an izango den UEMA eguneko herri arteko jokoetarako taldea osatu nahi dute

M.B. > BERGARA

Udaleko Euskara Zerbitzuak UEMA egunean egingo diren herri arteko Xiba jokoetarako taldea osatu nahi du. Ekainaren 12an ospatuko da UEMA eguna, Mallabian, eta beste hainbat ekitaldirekin batera jokatuko dira herrien arteko olinpiadok.

Taldeak zortzi lagun izan behar ditu: lau gizonezko eta lau emakumezko. Jokoei dago-

kienez, ez dute aparteko indar edo abileziarik eskatzen eta edonork egiteko modukoak izango dira. Hauek dira aurreikusita dauden jokoak: ingudea, sokatira, bertsoan, toka, auzolana -lokots batzea eta antzekoak-, egur pilatzea eta Aras Lama.

Izenematea da maiatzaren 31ra arte Udaleko Euskara Zerbitzuan (943 77 91 66) edo UEMAn (946 27 91 95).



Ingude proba iaz, Bergarako Pazkoetan.

GOIENKARIA

AISIALDIA > UDAKO KIROL IKASTAROAK

Izenematea zabalik udako kirol kanpainako ikastaroetarako

Ekainaren 4ra arte egongo da zabalik izenematea umeen zein helduen kirol eskaintzan

M.B. > BERGARA

Hasi da uda kanpaina Agorrosin Ekintza Gunean. Udako kirol eskaintza berezia ekainaren 28an hasiko da eta dagoeneko zabaldu dute eskaintza horren baitako ikastaroetan izena emateko epea.

Hain justu ere, ekainaren 4ra arte eman ahal izango da izena Agorrosin Ekintza Guneko harreran edo 943 77 70 95 telefono zenbakian.

UME ZEIN NAGUSIENDAKO

Iaz bezala, ume zein nagusiendako eskaintza berezitua eskainiko dute. Umeen -2 eta 18 urte artekoak- eskaintzaren baitan

honako ikastaroak egin ahal izango dira: multi-jarduerak, natura ekintzak, igeriketa, batuka, funky-a, irristaketa eta tenisa.

Helduen -18 urtetik gorakoak- eskaintzaren baitan, berriz, honako ikastaroak egin ahal izango dira: pilates, aerodance, aquaerobik, dantza latinoak, funky-a, irristaketa, areto txirringa, hirugarren adina, igeriketa, gimnasia harmonikoa eta gimnasia abdominal hipopresiboa.

GIMNASIA ABDOMINALA

Gimnasia abdominal hipopresiboa jarduerak berria da aurten, hau da, lehenengoz emango dute Agorrosingo udako eskaintzaren barruan. Abdomen eta torax aldeak, zoru pelbikoa eta pelbisaren mugikortasuna lantzen dituzten ariketak eta posturak landuko dira. Oso gomendagarria da, besteak beste, erditze osterako.



Umeak igeriketa ikastaroan.

GOIENKARIA

oharrak

IBILALDIA 2010

> **Ibilaldi jaira joateko autobusa antolatuko du Aranzadi ikastolak**

Txartelak eskura daitezke idazkaritzan hilaren 28ra arte, 08:30-18:00 ordutegian. Ibilaldia maiatzaren 30ean ospatuko da aurten eta Bermeon izango da.

ZOKZETA

> **Pilota elkarteak eman ditu, dagoeneko, zozketaren sariak**

5974 zorbakiari egokitu zaio lehenengo saria, buruz buruko pilota finalerako bi sarrera eta 500 euro, eta Ibon Etxabarriz izan da saritua. Bigarren saria 9066 zorbakiari egokitu zaio eta bi pertsonarendako aste bukaera Kantabriako Palacio De Guevara hotelean eta 250 euro, Gorka Irizarrek jaso ditu. Hirugarren sariari dagokionez, 3921 zorbakiari egokitu zaio eta bi lagunendako afa-ria Erreki jatetxean eta 100 euro Estitxu Aranzabalek jaso ditu.

BERTSOLARITZA > SAIOA

Bertso jaialdian parte hartuko dute herriko 321 neska-mutikok etzi

Lehen Hezkuntzako 4. mailatik DBHrainoko ikasleek bertsolari eta ahozkotasanari buruz eskoletan ikasitakoa erakutsiko dute

MIREIA BIKUÑA > OÑATI

Herriko lau ikastetxetako ikasleek bertso jaialdia egingo dute etzi Zubikoa kiroldegiko pilotalekuan. Guztira, 321 neska-mutiko igoko dira oholza gainera, ikasturtean zehar bertsolari eta ahozkotasanari buruz ikasi dutena erakusteko.

Bi saio egingo dituzte, 17:00etan bata eta 18:30ean bestea. Lehenengo saioan parte hartuko dute Txantxiku ikastolako 4. eta 5. mailako 94 ikasle; Elkar Heziko 5. mailako 30 neska-mutikok; Errekalde herri eskolako 5. mailako 18k; eta Elkar Heziko DBHko 30ek. Bigarrene-

an, aldiz, Txantxiku ikastolako 6. mailako 35ek; Elkar Heziko 6. mailako 30ek; Errekalde herri eskolako 6. mailako 7k; eta Zuzolako DBHko 47k jardungo dute.

OINARRIZKO KONTZEPTUAK

Guztiekin erakutsiko dute bertsolari eta ahozkotasanari

buruzko eskoletan zer ikasi duten. Astero ordubeteko eskolak jaso dituzte, eta, bi aste behin, Gipuzkoako Bertsozale Elkarteko irakaslearen bisita izan dute. Herriko ikastetxeetan irakasle lanak egin dituzte Iñaki Olalde, Estibalitz Alberdik eta Nerea Urrak.

Hilabete hauetan bertsolari erabili dute ahozkotasanari lanterako. "Bertsolaritzaren oinarriko kontzeptuak irakatsi dizkiegu: koplak, errimak, silabak,

doinuak... Gainera, kontzeptu horien bidez ahozkotasanari, irudimena eta euskara landu dute", esan digu Iñaki Olalde.

Jendaurrean abesterakoan zer sentitzen duten jakingo dute etzi. Guztiek botako dituzte bertsoak, eurek egindako koplak. "Guk gaiak proposatu dizkiegu, eta guztion artean aukeratu ditugu egokienak. Baina oholza gainera eurek egindako bertsoak abestuko dituzte. Originalak dira bertso guztiak", dio Olalde.

ESANAK

"Bertsolaritzaren oinarriko kontzeptuak ikasi dituzte: koplak, errimak, doinuak, silabak..."

"Guk gaiak proposatu dizkiegu, baina oholza gainera eurek konposatutako bertsoak kantatuko dituzte"

Iñaki Olalde > Irakaslea

Hasi dituzte Errekalde auzoa eraberritzeko lanak

Egun batzuetako atzerapenarekin hasi dituzte Errekalde auzoa eraberritzeko lanak. Ezkerreko espaloian hasi dituzte lanak. Hesitu egin dute eta lurra zulatzen hasi dira. Auzoa berritzeko lanak zazpi fasetan egingo dituzte. Orain lehena egiten dihardute; hain zuzen ere, Moiu kaleko bidegurutzetik Errekaldeko 26. zenbakiraino doan ezkerreko espaloian.

Zapateroren gobernuak emandako diruarekin itxura aldatuko diote auzoari, eta oinezkoen lehentasuna izango dute.



MIREIA BIKUÑA

HEZKUNTZA > OSPAKIZUNA

Elkar Hezi ikastetxekoek bi eguneko jaialdia egingo dute

Eguenean eta egubakoitzean hainbat ekintza egingo dituzte

M.B. > OÑATI

Elkar Hezi ikastetxeko ikasleek eta irakasleek bi eguneko jaialdia egingo dute. Eguenean eta egubakoitzean hainbat ekintza egingo dituzte, ikastetxean bertan eta Santa Marina plazan.

Eguenerako gurasoendako emanaldia antolatu dute. 6. mailako ikasleek dantzaz, musikaz

eta bertso musikatzuz osatutako *Lan baten bila* antzerkia egingo dute, 18:30ean.

AFARI-MERIENDA

Egubakoitzean beste emanaldi bat egingo dute: 14:30ean ikasleendako eta 18:30ean gurasoendako. Jaialdia bukatu ondoren afari-merienda egingo dute Santa Marina plazan. Ogitarte-koak, sagardo dastatzea eta kupeletik txotx egiteko aukera eta txosna zerbitzua egingo dira. Gainera, Miren, Gorka eta Agur taldeak erromeria egingo du.

ZIRKULAZIOA > OHARRA

Eguaztenetik ekainaren 8ra plazako aparkalekua itxita

Barrakak dauden bitartean Olaiturrin eta osasun etxearen atzean utz daitezke autoak

M.B. > OÑATI

Plazan, gaztelekuaren ondoan dagoen aparkalekua itxita egongo da autoendako eguaztenetik aurrera. Hain zuzen ere, ekainaren 8ra arte ezingo da autotik utzi, Corpus jaietako barrakak egongo dira-eta.

Udaltzaingotik aditzera eman digutenez, lehen barrakak etzi helduko dira Oñatira, eta herrian egongo dira jaiak bukatu arte. Bien bitartean,

autoak kiroldegiko lur azpiko aparkalekuan, osasun etxeko aparkalekuan edo Olaiturrin utz daitezke.

BARRAKAK, MERKEAGO

Bestalde, barraketako bidaiak iazko prezio berean salduko dituzte: 1,50 eurotan. Baina egun baten, maiatzaren 29an, bidaiaren prezioa merkeagoa izango da: egun horretan euro baten salduko dituzte txartelak.

oharrak

BIRZIKLAPENA

> **Baserrietako plastikoak batuko dituzte bihar**

Oñatin lau puntutan jasoko dituzte plastikoak: Zañartun, Zuzola inguruan; Murgian, Asentzio ermita ondoan; Olabarrietako autobus geltoki ondoan; eta ETE-Oren atzealdean. Siloa estaltzeko eta belar boletako plastiko beltza; berotegietan erabiltzen den plastiko beltza; eta berotegietako plastiko zuria batuko dituzte.

HITZALDIA

> **Sare sozialen gaineko ikastaroa gurasoendako**

Tuenti eta Facebook gurasoendako. Kontrol eta ikuskatze sistemak delako hitzaldiak egingo dituzte Txantxiku ikastolan ekainaren 7an eta 10ean.

ARETXABALETAK > DIRULAGUNTZAK

Gazteen egitasmoak laguntzeko deialdia

Kultur jarduerak eta produkzioak, GKEen proiektuak, eta lehenengoz gazteen egitasmoak aurrera eramateko dirulaguntza deiak egin ditu Udalak

MIRARI ALTUBE > ARETXABALETAK

Egunotan argitaratu ditu Udalak Gipuzkoako Aldizkari Ofizialean hainbat dirulaguntza deialdi. Laguntza horiek dira kultura jarduerendako, kultura produkzioak eta grabazioak egiteko, gazteen egitasmoendako, Gobernu Kanpoko Erakundeen proiektuetarako eta gizarte zerbitzuetan lan egiten duten erakundeendako.

GAZTEEN SORMENA SUSTATZEA

Gazteen egitasmoak aurrera eramateko laguntzen deialdia lehenengoz egin du Udalak. Gazteria Zerbitzuak proposatu du eta 16 urte beteta baina 21 urte baino gutxiago dituztenendako da. Lehenengo urtea arrakasta neurtzeko izango denez diru kopuru txikia bideratu dute, 600 euro hain zuzen.

Laguntza horren helburua da gazteen zaletasunak, sormen ekintzak edo antzeko egitasmoak aurrera eramateko laguntza ematea dirua traba izan barik. Eskaera aurkeztutako guztien artetik bi bakarrik hautatuko



Gazteak txalaparta ikastaroan gaztelekuan.

GAZTELEKUA

dituzte eta 300 euro emango dizkiote bakoitzari. Eskaerak aurkezteko epea urriaren 1ean bukatuko da.

GRABAZIOAK EGITEKO LAGUNTZA

Aurten egindako kultura proiektu eta jarduerak laguntzeko deia ere egin du Udalak eta 20.000 euro bideratu ditu horretara. Irabazi asmo bako taldeek antolatutako kultur ekimenak laguntzea du helburu eta beste ekimen batzuen osagarri edo gizarte interesekoak izan beharko dute.

Grabazioak egiteko masterrak eta beste kultura produkzio batzuk ere lagunduko dituzte, herriko taldeen produkzioak sustatzeko asmoarekin. 3.000 euro bideratu dituzte horretara eta eskaerak aurkezteko epe-

rik ez dute ezarri. Laguntza jasotzeko Aretxabaletakoak izan beharko dute taldekide erdiek.

GKE-ENDAKO 83.000 EURO

Gizarte zerbitzuen arloan lan egiten duten taldeek ere jaso ditzakete laguntzak eta 5.300 euro dituzte horretarako.

Eta garapenerako lankidetzak egitasmoak dituzten GKEendako laguntza ere iragarri dute eta 83.000 euro dituztela horretarako jakinarazi; baina kopuru horren %10 gorde egingo dute urtean zehar gerta daitezkeen larrialdietara bideratzeko erabili ezean banatzeko izango da urte bukaeran. Gipuzkoarra izan behar du talde eskatzaileak eta lehentasuna izango dute aretxabaletarrek.

ESKORIATZA > GIZARTE ZERBITZUAK

Adinekoen zaintzaileendako prestakuntza ikastaroak

Udalak eta Ingemak elkarrekin antolatu dituzte eta izenemate epea gaur zabaldu da

M.A. > ESKORIATZA

Zure nagusiak maite dituzenez hobeto zaintzen ikas ezazu leloarekin adineko ezinduek zaintzen dituzten senideendako ikastaroa antolatu dute Matia Gerontologia Institutua Fundazioak, Ingema, eta Eskoriatzako Udalak elkarlanean. Ekainaren 7a eta 11 bitartean gai ezberdinen gaineko bost berbaldi egingo dituzte Ibarraundi museoa (15:00-17:00). Berbaldi guztiak debalde dira baina izena aurrez eman behar dute interesatuek Udala Gizarte Zerbitzuetan (943 71 31 36). Gaurtik ekainaren 2ra bitartean egongo da zabalik izenemate epea -astelehenetik egubakoitzera, 09:00-13:30-.

ZAINZTA ZELAN HOBETU

Gai guztiz ezberdinak landuko dituzte adinekoen senideendako antolatutako berbaldietan, ezintasunak dituztenen zaintzan alderdi askok eragiten dutela jakinik. Hala, Hurkoa fundazio-kideek lege eta etika kontuen gainean jardungo dute: ezintasunak dituztenen tutoretza; alderdi fiskalak; lanean eragina...

Laguntza teknikoak eskaintzen dituzten Icavi Bikain taldekoek, ostera, ezinduek behar dituzten zaintzen gainean jardungo dute: elikadura eta garbitasuna; lehen sorospenak; etxebizitzan egin beharreko aldaketak eta segurtasun neurriak...

Eskoriatzako osasun etxeko erizaina den Lourdes Etxebarriak menpeko adinekoen arazoen berri emango diete eta udal gizarte langile den Agurtzane Altubek menpeko horiei laguntzeko dauden baliabideak eta laguntzak gogoraraziko ditu.

Azken berbaldia Oskar Mondragon psikologoak eskainiko du eta zaintzaileak norbere burua zaintzearen garrantziaren gainean jardungo du: zaintzailea zaintzea, autoezagutza eta autozaintza. Horretarako ariketak eta teknikak erakutsiko ditu.

Berbaldien egitaraua

Ekainak 7

Berbaldia: *Ikuspegi legal eta etikoak*
Hizlaria: HURKOA Fundazioa

Ekainak 8

Berbaldia: *Osasun, erizaintza eta laguntza teknikoaren ikuspegiak*
Hizlaria: ICAVI BIKAIN, laguntza teknikoak

Ekainak 9

Berbaldia: *Menpeko pertsonen arazoak*
Hizlaria: Lourdes Etxebarria (Osasun etxeko erizaina)

Ekainak 10

Berbaldia: *Menpekoea bere ingurunean zaintzeko baliabide sozialak*
Hizlaria: Agurtzane Altube (Udal gizarte langilea)

Ekainak 11

Berbaldia: *Komunikazio eta erlaxapen teknikak*
Hizlaria: Oskar Mondragon (Psikologoa)

oharrak

ESKORIATZA

> **Etxeko suteetatik babesteko berbaldia bihar**

Etxean sutatik babestu zaitez izeneko berbaldia egingo dute bihar, hilak 25, kultur etxean (17:30) Kutzak lagunduta.

ESKORIATZA

> **Ipuin kontaketa Peio Añorgarekin egunean**

Umeendako ipuin kontaketa saioa egingo du Peio Añorga kontalari ezagunak bibliotekan, egunean (18:00). Giza baloreak lantzeko ipuinak kontatuko ditu.

ARETXABALETAK

> **Euskal Herriko paisaiaren gaineko berbaldia**

Aste Berdearen barruan, Euskal Herriko paisaiaren gainean jardungo dute Joseba Errekondok eta Asier Galdosek. Egunean izango da hori, Arkupe kultura etxean (19:00).

ARETXABALETAK

> **Ezker abertzalearen proposamenaren aurkezpena**

Zutik Euskal Herria ezker abertzalearen proposamen berria aurkeztuko dute ekainaren 1ean, martitzena, Arkupe kultura etxean (19:00).



M.A.

Bertsotan ederto moldatzen direla erakutsi dute

Ikasturtean zehar bertsolaritza landu duten ikasleek ondo baino hobeto moldatzen direla bertsotan erakutsi dute. Arizmendi ikastolako Almen guneko 60 bat ikasle eta Kurtzebarri eskolako 30 bat elkartu ziren egunean, hilak 20, Iturrigorri frontoian. Lotsak alboratu eta aurrez gertatutako bertso ederrak bota zituzten, tartean Aretxabaletak dituen gabeziak agerian utzi eta konponbideak eskatzeko bertsoak.

IRIARTE

Umeen denda

Helduen lentzeria



Durana 8

Tel.: 943 79 10 96

ARETXABALETAK

ARAMAIO > EUSKALTZAINDIAREN EKITALDIAK

Patxi Uribarrenen sarrera ekitaldia egubakoitzean

Euskaltzaindiak hileroko batzar nagusia egingo du goizean udaletxean; Patxi Uribarrenen omenezko ekitaldia arratsaldean, San Martinen

EDU MENDIBIL > ARAMAIO

Patxi Uribarren aramaioar euskaltzain osoaren sarrera-ekitaldia izango da egubakoitzean, hilaren 28an, Ibarako San Martin elizan. Hain zuzen ere, *Zirelako gara, garelako izango dira* izenburuko hitzaldia egingo du Uribarrenek. Erantzuna, berriz, Jose Luis Lizundiak emango dio, *Ganbarruetatik Araba euskaldunera* izenburuko hitzaldiarekin.

Ekitaldia 18:00etan hasiko da eta Patxi Uribarrenekin batera hantxe izango dira, besteak beste, Andres Urrutia Euskaltzaindiko presidentea eta Asier Agirre alkatea. Agirrearen ongi-etorriaren ondoren, Andres Urrutiak hartuko du hitza eta jarraian Patxi Uribarrenen txanda izango da.

Patxi Uribarrenen omenezko ekitaldia aprobetxatuz, Euskaltzaindiak hileroko batzar nagusia egingo du egunean bertan, goizean, Aramaioko udaletxean. Era berean, Euskaltzaindiak erakusketa berezia prestatu du Sastiñako ermitan: Euskaltzaindiaren historia laburra eta Patxi Uribarrenen argitaratutako lanak daude ikusgai.



Patxi Uribarren euskaltzain osoa.

GOIENKARIA

Patxi Uribarren Aramaioko Etxaguen auzoan jaiotakoa da; nahiz eta bere bizitzaren zati handi bat herritik kanpo igaroduen, betidanik izan du lotura oso estua Aramaiorekin. Sarri etortzen da jaioterrira, familia bertan dauka-eta. Hain zuzen, horixe izan da sarrera-hitzaldia Aramaioren egitea aukeratzeko arrazoi nagusia.

HERRITARREI GONBIDAPENA

Udalak ere hartu du parte ekitaldiaren antolakuntzan: herriko txistulariek, dantzariak, trikitilariak eta Bizente Goikoetxea abesbatzak hartuko dute parte, besteak beste. Egubakoitzeko ekitaldira 200 lagundik gora gonbidatu dituzte, baina ekitaldia irekia da; interesa duen edonor joan daiteke.

AZKEN EGUNA, DOMEKA

Izena emateko epea zabalik dago domekara arte, hilak 30. Horretarako, Juan Mari Makatzaga edo Tere Aranburuzabala zuzendaritzako kideekin egin behar dute berba. Izenemate data errespetatzeko eskatu dute antolatzaileek, jatetxean lekua gorde eta autobusa eskatu behar dutelako.

LEINTZ GATZAGA > ERRETIRATUAK

Kantabriako Isla eta Noja herriak ezagutzera joango dira erretiratuak ekainaren 4an

Izena emateko epea zabalik dago domeka arte eta Toki Ederreko zuzendaritzako kideei jakinarazi behar diete interesatuek

MIRARI ALTUBE > LEINTZ GATZAGA

Toki Eder erretiratuen elkarteak irteera egingo du datorren ekainaren 4an, egubakoitza. Kan-

tabria aldera joango dira, kostaldean dauden Isla eta Noja herriak ezagutzeko asmotan.

Santander hiriburutik 50 bat kilometrorra daude bi herriak, elkarrengandik oso gertu, eta, eguraldia lagun izanez gero, paraje ezin politagoak dituzte biek. Herriko altxorak ezagutzeko aukera izango dute, Islako kondeen jauregia eta Nojako San Pedro eliza esaterako, eta inguruko bazterrak ere bai; tartean, hiru kilometro eta erdi dituen Trengandin hondartza. Gero Isla

inguruko jatetxe baten bazkalduko dute, eta, etxera bidean, Bizkai aldean geratuko dira beste bisitatxo bat egiteko.



Erakusketa Eskoriatzako Ibarraundi museoan.

MIREIA BIKUÑA

ELGETA > INGURUMENA

Ehun-hondakinen gaineko erakusketa Espaloian

Emaus erakundearen eta Udal Ingurumen batzordearen eskutik, arroparen berrerabilpena eta birziklatzea aztergai

LARRAITZ ZEBERIO > ELGETA

Ehun-hondakinen kudeaketa, berrerabilpena eta birziklatzea ez dago oso zabaldua. Nola eta zergatik egiten den ezagutzera emateko erakusketa egongo da ikusgai Espaloian hilaren 26tik aurrera. *Ezagutu formularik iraunkor eta solidarioena: +3R = -CO2* izeneko kanpainaren barruan kokatu behar dugu ekimena, eta, besteak beste, sentsibilizazioa du helburu.

DATU DEIGARRIAK

Emausko Begoña Cabaleiroren esanetan, ehun-hondakin gehiago sortzen dugu. "%80 emakume arropa da, eta egerra onean dagoena. Helburua da zabortegian amaitu beharrean, berrerabiltzea". Edukiontzia zurira arropa garbia eta erabiltzeko modukoa botatzeko eskatzen dute Emaustik. Informazio gehiago zabaltear duten erakusketan emango dute.

ANTZUOLA > IKASTAROA

Bihar hasiko dute memoria lantzeko ikastaroa

Erretiratuek Bizikasirekin batera antolatutako ikastaroa izango da

ALDE TEORIKOA ETA ARIKETAK
Ikastaroak bi zati izango ditu: alde batetik, alde teorikoa landuko dute. Besteak beste, ikasiko dute memoriak zelan funtzionatzen duen.

Beste zatia alde praktikoa izango da. Memoria lantzeko hainbat ariketa egiten ikasiko dituzte ikastaroan parte hartzen dutenek.

Ikastaroak ematera dedikatzen den Eibarko enpresa bat arduratuko da ikastaroaz.

BIZIKASI ZER DEN

Bizikasik Bergarako Migel Altuna institutuan dauka egoitza, eta Debagoieneko Bizitza Osoan Zeharreko Ikaskuntzako (BOZI) bitartekotza zerbitzua da. Prestakuntza arutuan sartzeko erraztasunak ematen ditu Bizikasik, batez ere, gizartean kaltetuenak diren kolektiboak.

Doako zerbitzua da, eta Eusko Jaurlaritzak diruz lagundutakoa.

ARANTZAZU EZKIBEL > ANZUOLA

Bihar hasiko da erretiratuen elkartearen egin behar duten memoria lantzeko ikastaroa. Bizikasiren laguntzarekin antolatutako ikastaroa izango da. Erretiratuen elkartearen izango den arren, herritar guztiei zuzendutako ikastaroa da.

20 LAGUN

Dagoeneko izenematea amaituta, 20 lagunek eman dute izena ikastaroan. Bihar, maiatzak 25, izango da ikastaroaren lehengo eguna. Hurrengo egunak izango dira ekainaren 1a, 8a eta 15a. Ikastaroek bi orduko iraupena izango dute: 16:00etatik 18:00etara, erretiratuen elkartearen bertan.

Kirola



> **FUTBOLA**
Mondrak 1-0 irabazi zuen Bergararen kontrako derbia, zapatuan > 22



> **SASKIBALOIA**
Aloña Mendi liga txapelketako irabazlea izan da > 24



> **TXIRRINDULARITZA**
Caja Ruraleko Jordi Simon izan da azkarrena Bergarako lasterketan > 25



Bergaran, San Martzialgo aldapan behera jokatu zuten goitibehera lasterketa.

JOSETXO ARANTZABAL



Oñatin, Larraingainetik Errekalde auzora bitartean eskaini zuten ikuskizuna.

LANDER MUÑAGORRI

GOITIBEHERAK > BI LASTERKETA ASTEBURUAN

'La gondola del amor' jaun eta jabe goitibehera lasterketetan

PARTE-HARTZEA

Bergaran, hamar goitibeherak hartu zuten parte; eta Oñatin, lau gehiagok eman zuten izena

BERRESKURATU

Azken urteetan ez zen era honetako lasterketarik egiten Debagoiengan, eta orain berreskuratu da

LANDER MUÑAGORRI > BERGARA
Maldan behera, abiadura bizian, eta irudimen askorekin. Horrela ibili dira asteburu honetan Oñati eta Bergarako goitibehera lasterketetan. Era guztietako ibilgailuak ikusi ahal izan dira, landuak eta juxtu-juxtu malda jaisteko modukoak. Goitibehera lasterketa batean parte hartzeko gauza handirik ez dela behar argi gera-

tu da: nahikoa da irudimena izan eta aldapan behera joango den ibilgailu bat egitea.

BI LASTERKETETAN GARAILE

Zapatuko Bergarako lasterketan, hamar ibilgailuk hartu zuten parte. Hamasei urtetik beherako kategorian, Jokin Gutierrez izan zen garaile; eta hamasei urtetik gorakoan, bestalde, Asier Leizea eta

Gurutz Agirre gailendu ziren *La gondola del amor* izenarekin bataiatu duten goitibeherarekin.

Oñatiko atzoko txapelketan, bestalde, hamalau ibilgailu joan ziren Larraingainetik behera. Tartean zeuden Bergarako parte-hartzaileetako batzuk eta, berriz ere, Leizea eta Agirre gailendu ziren, kasu honetan pneumatiko kategorian. Errodamendu kategorian, *Güeñes* goitibehera izan zen nagusi; eta arinetan, azkenik, *Kaiser*.

Azken urteetan ez zen goitibehera lasterketarik egiten Debagoiengan. Asteburu honetan ordea, bi egin dira. Parte-hartzea altua izan da, eta pilotuek sentazio onak izan zituztela nabarmendu dute. Hemendik aurrera lasterketa hauek urteroko zita bihurtzeko, badaude nahikoa arrazoi, hortaz.

'LA GONDOLA DEL AMOR' GOITIBEHERA

Autoa bezain azkar doan goitibehera

"Ia auto bat bezala da, abiadura handia hartu dugu berarekin" dio Asier Leizea pilotuak bere goitibeherari buruz hitz egiterakoan. Oñati eta Bergaran, azkarrena izan zen *La gondola del amor*, baina gainerako goitibeherak badute kontsolamendua, pasa den urtean Asier Leizea eta Gurutz Agirre Espainiako Txapelketako garaile suertatu baitziren.

Goitibehera puntuan jartzeko ordu asko sartu duten arren, ibilgailua ez da Leizea eta Agirrek egindakoa. "Bergarar batek egin zuen eta txapelketak utzi zituenean erosi egin genion".



Leizea eta Agirre.

L.M.

OHOREZKO ERREGIONALA > 33. JARDUNALDIA

Gola eginez utzi du futbola 'Keixi'-k

Urte mordoia eta gero futbola utziko du 'Keixi'-k; zapatuan omendu egin zuten Mojategin

Derbiak ez zuen bizitasunik izan; Bergarak ondo eutsi zuen baina gola Mondrak egin zuen

MONDRA

1-0

BERGARA

Mondra > Mikel (Errasti, 75. min.), Mercader, Illart (Castillo, 60. min.), Oier (Nuñez, 45. min.), Laspiur, Zabaleta, Pavon (Azpeitia, 75. min.), Ekain, Murua, Keixi eta Maikel.

Bergara > Imanol, Garitano (Oregi, 45. min.), Beñat, Inurrita, Agirre, Loyola, Agirrezabal, Arazkonaga, Nafarrete, Jon eta Iraola.

Gola > 1-0: Keixik, 35. min.

IKUSTEKO JOKO ESKASA

Etxekeko lehenengo aukera Muruak izan zuen: eskuin hegaletik erdiratutako baloia buruz jo zuen Muruak, baina baloia atezainaren eskuetara joan zen zuzenean.

35. minutuan egin zuen Mondrak gola: area ertzean adierazitako falta *Keixi*-k jaurti zuen, eta baita gol bikaina lortu ere. Eguna borobiltzeko modu paregabea izan zen Arrasateko erdi-lariarendako gola egitea.

Aldagelatik bueltan bi entrenatzaileek hainbat aldaketa egin zituzten. Hala ere, partidua nondik norakoan ez zen nabaritu. Bergarak ondo eutsi zuen erdialdean eta gola egiteko aukerak sortu zituen arren, mahone-roak ez ziren gauza izan Mondraren atea hausteko.

Partiduko 70. minutuan bergarrek Martini egindako penaltia eskatu zuten; epaileak, baina, Bergarako aurrelariak bere burua bota zuela esan eta ez zuen ezer adierazi. Jokaldi haren ondorioz, Martinek zelaiari utzi behar izan zuen lepaustuian min hartuta eta ospitalera eramane behar izan zuten. "Penalti garbia egin diote; jokalariei batek bere burua botatzen duenean ez



Ekain Garin baloiarekin Bergarako kontrarioa ondoan duela.

JOSETXO ARANTZABAL

ARANTZAZU EZKIBEL > ARRASATE

Zapatuko derbiko protagonista nagusia Ander Bereziartua *Keixi* izan zen. Mondraren eta Bergararen arteko lehiak ez zuen emoziorik izan; bi taldeek ezer ez zuten jokoan eta, ondorioz, hori nabaritu egin zen zelaiari. Hala, partiduko omenduak hartu zuten protagonismoa Mojategin.

Partidua errotimoa Bergarak jarri zuen hasieratik. Zelai erdian nagusitu egin ziren Manu Diazen mutilak eta aukera garbirik sortu ez zuten arren, mahone-roendako izan ziren aukera apur bakarrak lehenengo minutuetan.

du minik hartzen", esan zuen haserre Manu Diaz entrenatzaileak partidua amaieran.

EPAILEAREN LANAREKIN HASERRE

Penaltian eta, orokorrean, partidua guztian epaileak izan zuten jarrera salatu zuen Bergarako entrenatzaileak. Mahone-roek gogor lan egin zuten arren, azkenean esku hutsik itzuli behar izan zuten Arrasateetik.

"Gu, Mondra baino gehiago izan gara eta aukera gehiago izan ditugu, baina gola eurek egin

du", adierazi zuen Diazek. Gainera, epailearen lana kritikatu zuen eta, beste behin, "epailearen erruz" galdu dutela esan zuen Bergarako entrenatzaileak.

AGUREN ARRATSALDEA

Azken urteetan Mondrako kapitain izandako *Keixi*-k futbola utziko du. Hala, zapatuan etxekeko omenaldia jaso zuen. Partidua hasieran, *Muxik*, Argiderrek Aranek eta Rubenek aureskua dantzatu zuten Mondrako 10ari. Ondoren, Patxi de Andres

presidentek oroigarria eman zion; eta, Iker Laspiurrek, jokalariek guztiek sinatutako kamiseta. *Keixi* "oso pozik" zegoen egin zioten omenaldiarekin. Gainera, partiduko gola egin zuen: agurra borobiltzeko modu ezin hobea. Aurrerantzean futbolarekin harremanetan jarraituko ote duen galdetuta, oraingo ezetz, aste bukaera "lasaiak" izan gura dituela esan zigun *Keixi*-k.

Andoni Azkargortak ere taldea utziko du; zapatukoa etxekeko azkeneko lehia izan zuen.



Mondrako jokalariek pasilloa egin zioten *Keixi*-ri.

A.E.



Muxi, Argider eta Ruben aureskua dantzatzen.

A.E.



Laspiur eta *Keixi* garaikurrekin.

A.E.

EMAKUMEZKOAK > KOPAKO FINALA

Arrasateko neskek ezin izan dute Kopa irabazi eta denboraldia borobildu

MONDRA

1-4

EIBAR

'Txisko' Lopezen neskek 1-0 irabazten hasi ziren arren gairaipenak ihes egin zien; lau gol jaso zituzten kontra

Denboraldi zaila izan dela adierazi du entrenatzaileak: atezain barik jokatu dute ia denbora osoan

ARANTZAZU EZKIBEL > BERGARA

Arrasateko neskek ezin izan dute iaz lortutako Kopa garaipena berretsi. *Txisko* Lopezen neskek 1-4 galdu zuten zapatuan Eibarren aurka Bergarako Ipintza zelaian. Garaipenak ihes egin arren, entrenatzailea pozik eta harro zegoen neskek bai finalean eta baita denboraldi guztian ere egin-dako lanarekin.

IRABAZTEN HASI ZIREN

Arrasatearrek bazekiten zapatuko finala zaila izango zela; aurrean, Eibar talde beteranoa zeukaten; eta, gainera, Arrasateko taldea baja askorekin joan zen Ipintzara.

Hala ere, gogor hasi ziren *Txisko*-ren neskek. Zelaian ondo kokatuta, baloia kontrolatzeko gauza izan ziren. Lehenengo gola penalti bidez egin zuten: kontra-erasoko jokaldi baten Eibarko atzelariak baloia eskuarekin ukitu eta penaltia adierazi zuen epaileak. Alaienez hartu zuen penaltia jaurtitzeko ardura eta ez zuten



Arrasateko neskek txapeldunordearen garaikurrarekin.

JOSETXO ARANTZABAL

hutsik egin. Ondorioz, markagailuan aurretik jarri ziren arrasatearrak.

Pozak, baina, gutxi iraun zuen arrasatearren artean. Hurrengo minutuan, korner jaurtiketa batean, Arrasateko defentsak huts egin eta Eibarrek berdinetaren gola egin zuen.

ARRASATEARRAK BEHERA

Berdinetaren golak indarra eman zien eibartarrei. Aurrera egin zuten armaginek eta beste gol bat egiteko gauza izan ziren. Hala, bi gol aurka zituztela, arrasatearrak behera egin zuten jokoa eta baita animuan ere.

Aldagelatik bueltan arrasatearrak erasora atera ziren. Eibartarrek, hain justu, hori aprobetxatu eta kontraerasoan bi gol egin zituzten.

Hortaz, *Txisko*-ren neskek txapeldunordearen garaikurrarekin konformatu behar izan zuten zapatuan.

ENTRENATZAILEA, POZIK

"Jokalariek gogoa eta ilusioa jarri dute... ezin zaie gehiago eskatu!", adierazi zuen partidu amaieran pozik *Txisko* entrenatzaileak. Gaineratu zuen, aurtengoa oso denboraldi zaila izan dela: "Atezain barik jokatu dugu ia denboraldi osoan, jokalaria bat jarri behar izan dugu atean".

Bi denboraldi eta erdi egin ditu *Txisko*-k Mondran; iaz Kopa irabazi zuten eta aurten bigarren egin dute. Nesken futbolak laguntza handiagoa behar duela gaineratu du: "Nesken futbola oso ikusgarria da, benetan merezi du ikustera etortzeak".



Jokalaria baloiarekin, aurkaria gainean duela.

J.A.

OIARTZUN

2-0

ALOÑA MENDI

OHOREZKO ERREGIONALA > 33. JARDUNALDIA

Oiartzunen aurka galduta sufritzea egokitu zaio Aloñari

A.E. > BERGARA

Azken asteotako bolada txarra ezin amaituta dabil Aloña Mendi. Zapatuan 2-0 galdu zuten Pablo Diazen mutilek Oiartzunen; modu horretan, ligako azkeneko jardunaldira arte sufritzea tokatuko zaie oñatiarrei.

Diaz gustura zegoen jokalariek Karla Lekuona futbol zelaian izan zuten jarrerarekin. Partidu lehiatua izan zen; eta, entrenatzailearen arabera, jokalaria guztiak ezin jokatu izanak eta berak eragina izan zuten azken emaitzan.

PENALTIA GARBIA

Oñatiarrek lehenengo gola lehen zatian egin zuten; ondoren, aldagelatik bueltan, emaitza berdintzeko aukera paregabea izan zuen Aloñak: penalti garbia egin zioten Aloñari baina epaileak ez zuten ezer adierazi. Ondoren,

Oiartzunen bigarren gola etorri zen, eta partidua hor amaitu zen.

Aloña sailkapeneko 13. tokian dago 41 punturekin. Liga amaitzeko jardunaldi bakarra falta denean, azkeneko postuak erabakitzeko daude. Datorren astean Hernaniren bisita izango dute.

> ERREGIONAL PREFEREN.

Antzuolak denboraldia 9. postuan amaitu du

Joan den astean amaitu zuen liga Antzuolako taldeak (Antzuola 0-3 Anaitasuna). Bigarren itzuli eskasa egin ostean, azkeneko postuak gertu izan zituzten antzuolarrak. Hala ere, mailari eustea lortu du Igor Larrea eta Iban Unanuek zuzentzen duten taldeak. Antzuolarrak 9. postuan amaitu dute liga 37 punturekin.

ESKUBALOIA > KOPA

Arrasatearrak kopako finaleko atarian geratu dira

Joan den astean atzeratutako lehia jokatu zuten zapatuan Eibarren eta 39-35 galdu zuten

Jokalari garrantzitsuen falta izan zuen Edu Orgazen taldeak eta hori nabaritu egin zuten

ARRATE

39-35

FORD MUGARRI

ARANTZAZU EZKIBEL > BERGARA

Kopako finala eskuetan izan dute arrasatearrek, baina azkenean finala jokatu barik geratuko dira. Zapatuan jokatu zuten Arrateren aurka finalerdia; 39-35 galdu zuten Edu Orgazen mutilek.

JENDE GUTXI

Orgaz jokalaria gutxiarekin joan zen Eibarrera. Jokalari garrantzitsuak, gainera, falta zituen: Jorge Santos, Kepa Isasmendi eta Jonan, besteak beste. Hala ere, arrasatearrak ez ziren kikildu eta indartsu irten ziren kantxara.

Lehenengo zatia nahiko parekatua izan zen. Bi taldeek egin

zituzten merituak markagailuan aurretik ibiltzeko. Hala ere, atsedenera eibartarrak aurretik joan ziren: 23-20.

"Hainbat unetan markagailuan aurretik izan gara, nahiko lehia berdindua izan da", azaldu du Orgaz entrenatzaileak.

BIGARREN ZATIA

Bigarren zatian arrasatearrak indartsu atera ziren. Markagailuan aurretik jarri ziren, bi goleko aldearekin. Gainera, joko ona egin zuten. "Azken minutuetara, baina, nekatuta iritsi gara. Kontuan hartu, jokalaria gutxiarekin joanda, bi aldaketa egiteko aukera besterik ez dugula izan", azaldu du Orgazek.

DEFENTSA ONA

Bi taldeek 6-0 defentsa egin zuten. "Defentsan serio jokatu dugu eta pozik nago jokalariek orokorrean egin duten lanarekin", gaineratu du entrenatzaileak.



Ford Mugarriko jokalaria jaurtiketa egiteko gertu.

ARTXIBOA

Atzoko partiduez bakarrik ez, orokorrean denboraldi guztian egindako lanarekin dago pozik Edu Orgaz. "Gutxi falta izan zaigu lehenengo mailako igoera fasea jokatzeko eta azkenean kopako finalean ere, atarian geratu gara", esan digu Orgazek.

"Ez nuen espero hain denboraldi ona egingo genuenik. Egia esan, jokalaria guztien jarrera oso ona izan da eta pozik nago

egin duten lanarekin", gaineratu du Orgazek. Zapatuan, esaterako, bigarren taldeko hiru jokalaria izan ziren Eibarren, eta entrenatzailearen esanetan oso ondo ibili ziren.

DATORREN URTEAN, ZER?

Behin finaletik kanpo geratuta, Ford Mugarrrik bukatu du aurtengo denboraldia. Oraindik, datozen bi asteetan entrenatu egingo

dute, eta Orgazek adierazi digu datorren denboraldiari buruz berba egingo duela zuzendaritza taldearekin.

Kopa txapelketa liga moduan jokatu dute. Sei taldeko bi multzo egin dute; eta, multzo bakoitzeko onenak jokatu du kopako finala. Kasu honetan: Arrate eta Ereintza. Ford Mugarrri bigarren geratu da, kopako finala jokatzeko atarian.



Aloña Mendiko jokalariek garaikurrarekin.

ENEO BLANCO

SASKIBALOIA > LIGA AUTONOMIKOA

Aloña Mendi liga txapelduna da azken lehia irabazi ostean

A.E. > BERGARA

Igoera eskuratuta, lehenengo postua zuen jokoan zapatuan Aloña Mendik Ibaizabalen aurka. Oñatiarrek denboraldi oso ona egin dute, eta liga irabaztea

denboraldia borobiltzea litzatekeela argi zuten. Hala, indartsu atera ziren Galdakaoko kantxara Xabi Igartuak zuzentzen dituen mutilak. Gamarra, Anduaga, Mallabiabarrena,

Zabaleta eta Biain izan ziren hasierako bostekoan jokatu zutenak.

Emaitza (54-84) eta jokoa ikusita, argi dago oñatiarrek ez zutela areriorik izan Galdakaoko kantxan. Hasieratik jarri ziren markagailuan aurretik oñatiarrek. Laurdenetako partzialak izan ziren: lehenengo laurdena, 15-18; bigarren laurdena, 8-28; hirugarren laurdena, 13-20; eta laugarren laurdena, 18-18.

LEHENENGO NAZIONALA

Lehenengo aldiz historian Aloña Mendik lehenengo nazional mailan jokatu du datorren denboraldian. Xabi Igartuak zuzentzen duen taldeak bi urteetan bi maila igo ditu.

Aurten, denboraldi bikaina egin dute oñatiarrek: 25 partidu irabazi dituzte, eta bost bakarrik galdu. Gainera, azkeneko 16 partiduak jarraian irabazi dituzte. Hala, ligako talde onena izan da Aloña.

Oñatiarren esku zegoen liga irabaztea. Zapatuan Ibaizabali irabaztea nahikoa zuten; bigarren Santurtzi geratu da.

ESKUBALOIA > IGOERA FASEA

Puntu barik itzuli dira bergararrak Deustutik

DEUSTUKO UNIBERTSITATEA

31-29

BERGARA

A.E. > BERGARA

Esku hutsik, puntu barik itzuli dira Muniategiren mutilak Deustun jokatuako lehiatik. Zapatu arratsaldean jokatu zuten igoera faseko 8. jardunaldiko lehia. Bergarako mutilek ez zuten joko ona egin; batez ere, defentsan izan zituzten huts egiteak.

LEHENENGO ZATIAN ,ONDO

Markagailuan atzetik ibili ziren arren, mahoneroek bilbotarrekiko tartea mantentzea lortu zuten.

Bigarren zatian, batez ere hasierako minutuetan, Deustuko taldeak distantzia handitzea lortu zuten. Hala ere, mahoneroek ez zuten amore eman eta bi taldeen arteko tartea txikitu zuten. Berdinketa ere esku-ria izan zuten.

JOKALARI GUTXI

"Minutu askotan hainbat jokalaria min hartuta izan ditugu, eta horien falta sumatu dugu", adierazi zuen partidu amaieran Muniategi entrenatzaileak.

Horrez gain, bero izugarria izan zuten zapatu arratsaldean Bilbon mahoneroek.

BI PARTIDU

Bi partidu falta dira igoera fasea amaitzeko. Datorren astean Corazonistas hartuko dute etxean, domekan, 12:30ean.

TXIRRINDULARITZA > LEHENAKARI TXAPELKETA

Caja Ruraleko Simon izan zen azkarrena Bergarako helmugan

Elgetatik behera zetorrela ihes egin zuen Jordi Simonek eta bakarrik sartu zen helmugan

Pello Bilbao bigarrena izan zen eta, gainera, mendiko sariko garaikurra irabazi zuen

ARANTZAZU EZKIBEL > BERGARA

Bakarrik, ihes eginda iritsi zen Caja Ruraleko Jordi Simon atzo San Antonioko helmugara. 2:32:53ko denbora behar izan zuen Simonek 107 kilometroak egiteko, Pello Bilbao baino 17 segundo gutxiago.

Lasterketa hasi bezain laster talde handi bat tropeletik irten zen. Bergararik Elgoibarrera hartu zuten txirrindulariek. Handik bueltan, ihes egindako 10 laguneko taldea pasa zen Bergarako saihebidetik lehenengo.

KANPAZAREN GORA

Epeleko bidegurutzera iritsi orduko, baina, tropelak eta taldetxoak bat egin zuten. Hala, denek batera ekin zuten Kanpanzarren gora.

Kanpanzarko gaintetik Elgetarako bidea hartu zutenean, Jordi Simon eta Pello Bilbao tropeletik ihes egin zuten. Elgetan, Caja Ruraleko Jesus Herradak eta Seguros Bilbaoko Ramon Domenekek bat egin zuten lasterketa buruan zeudenekin.

Elgetatik behera, Jordi Simonek lauko taldetxotik ihes egin eta helmugara bakarrik iristea lortu zuen. Caja Ruraleko txirrindulariak ez zuen areriorik

Sailkapena

1.Jordi Simon	2:32:53
2.Pello Bilbao	2:33:10
3.Jesus Herrada	2:33:10
4.Ramon Domene	2:33:31
5.Juan Carlos Riutort	2:33:31
6.Ibai Salas	2:33:31
7.Jokin Leanizbarru	2:33:31
8.Alberto Guinea	2:33:31
9.Haritz Orbe	2:33:31
10.Cristobal Sanchez	2:33:31

ITURRIA: TXIRRINDULARI FEDERAZIO

izan azkeneko kilometroetan. Egiten zuen beroari aurre egin eta bakar-bakarrik sartu zen San Antonioko helmugara.

GARAIKURRAK

Pello Bilbao ere ihes egin zuen azkeneko metroetan. Hala, bigarren sartu zen helmugan. Gainera, Bilbao mendiko sariko garaikurra jaso zuen.

Taldekatu sailkapenari dagokionez, Caja Ruralek eroan zuen talde onenaren saria; bigarren Naturgas sailkatu zen; eta hirugarren Seguros Bilbao. Lehendakari txapelketako maillota, ostera, Ramon Domenekek jantzi zuen. 107 kilometrotako lasterketa izan zen atzokoa.



Jordi Simon helmugara sartzen.

JOSETXO ARANTZABAL

PILOTA

Bergara Hiria: finalak gaur izango dira

Azken urteetan bezala GOITBK finalak eskainiko ditu bihar, 22:15ean

A.E. > BERGARA

Gaur jokatuko dituzte Bergara Hiria txapelketako finalak. 19:30etatik aurrera izango dira partiduak Bergarako Udal pilotalekuan.

22 urtez azpikoetan, Jaurerri eta Aizpuru izango dira Ansotegi eta Lanaren aurkariak. Joan den martitzenean jokatuiko finalerdietan Jaurerri eta Aizpuru 22-19 irabazi zieten Mendinuetari eta Arriagari.

SENIORRAK

Nagusietan, maila handiko finala izatea espero da gaurkoa. Izan ere, joan den martitzeneko finalerdiko lehiak oso onak izan ziren. Gorkak bikain bete zuen Oñsaloren tokia eta Galarragarekin batera finalerako txartela lortu zuten 22-11 irabazita Yoldi eta Lintzoaini.

FINALA TELEBISTAN

Aurtengo txapelketa 15. ekitaldia da. Azken urteetan egin den bezala, GOITBK finalak eskainiko ditu bihar, martitzena, 22:15ean.

Ohiko denez, giro ederra eta zaleen babesa espero dute gaurko partiduetan.



JOSETXO ARANTZABAL


Bergarako I. erremonte txapelketa

Etxeberria IV.-Urrutia eta Urtasun-Lizaso finalerdiak jokatzeko sailkatu dira Bergarako I. erremonte txapelketan. Beste finalerdiak datorren zapatuan jokatuko dituzte. Etxeberria IV. eta Urrutiak 40-27 irabazi zieten Juaristi eta Etxeberria III.ari. Bestalde, Urtasun eta Lizasok 40-29 irabazi zieten Uterga eta Badiolari.

Espero bezala Xalاک 22-16 irabazi dio Iker Arretxeri Bergaran

Xalاک eta Arretxe II.ak ligako azkeneko partidua jokatu zuten atzo Bergaran. Lekuineko aurrelariak jada finalerdietarako txartela eskuratuta zuen; hortaz, garrantzi gutxi partidua izan zen atzokoa. Xalاک ez zuen partidu borobila egin; hala ere, 22-16 irabazi zion Iker Arretxeri, eta partidu guztian izan zen markagailuan aurretik.

Bero asko egin zuen atzo Bergarako Udal pilotalekuan. Bi pilotariak gogor egin zuten lan, eta ondorioz partidu amaierara leher eginda iritsi ziren. Gainera, esan behar da, Arretxe II.ak partidu ikaragarria jokatu zuela atzo Bergaran.



JOSETXO ARANTZABAL



Bergara Hiria Pilota Txapelketako finalak

SAIO BEREZIA

Martitzenean, maiatzak 25, 22:15ean.

Esatariak: Julen Iriondo eta Migel Etxaniz.

Goitb
Goiena Telebista
Ikustekoa!

Babesleak:



BOLINTXO
OKINTEGIA

■■■■■■■■■■
GOKI ERREFORMAK, S.L.
■■■■■■■■■■

Garikoitz Arregi > Txirrindularia

"Bost eguneko lasterketa, beroa, desertua... bizi iraupena zelako eman nuen izena"

ARANTZAZU EZKIBEL > BERGARA

Garikoitz Arregi bergarra Bergarako zikloturista taldeko presidentea da. Ziklismoa gustuko duela argi dago: maiatz hasieran Marokon izan zen, Nissan Titan Desert proba jokatzeko. Mendia eta desertua uztartzen dituen proba da. Han bizi izandako esperientzia azaldu digu ondorengo lerroetan.

Azaldu zelako lasterketa den Nissan Titan Desert.

Bost eguneko lasterketa da: lehenengo hirurak 100 kilometro ingurukoak, laugarrena luzeagoa, 150 kilometrokoa, eta azkena motza. Kontua da hirugarren etapa oso gogorra zela, eta, gainera, aldean eraman behar izan genituela gure gauza guztiak, egun hartan ez genuen-eta laguntzarik izan. Hortaz, etapa gogorrena eta etapa luzeena elkartu ziren.

Zein da lasterketa honen berezitasuna besteekin alderatuta?

Desertuan mendi bizikletarekin ibili, Atlasean sartu... denetik du lasterketak. Gainera, *road book* bat ematen ziguten eta GPS

sistema ere erabili behar izan genuen; kontua da koordenada batzuk ematen dituztela eta hara joan beharra dagoela. Horrek ematen du aukera jolasteko: batzuek bide bat hartzen dute eta beste batzuek beste bide bat.

Egia da, baina, antolakuntzak ez duela sustorik gura izan eta bidea nahiko ondo markatuta zegoela.

Espero zenuen modukoa izan da esperientzia?

Hasiera baten uste onua baino samurragoa egin zait; ez dakit, agian ondo gertatuta joan naizelako. Orientazioa, beroa, desertua... hasieran beldur hori nuen, baina ez zait horren gogorra iruditu.

Entrenamendu berezirik ez dut egin. Urte hasieran Flandesko Tourrera joan ginen; probe txatu genuen lasterketa hark 260 kilometro dituela entrenamendua egiteko. Horrez gain, mendian pixka bat ibiltzea nahikoa da; gainera, ez dut uste mendirako guztiz preparatuta egon behar denik. Mendi bizikleta da, baina ez da teknikoa.

ANTOLAKUNTZA

"Ez dute sustorik gura izan eta bidea ondo markatuta jarri dute inor ez galtzeko"

SENTSAZIO ONA

"Hasieran uste onua baino samurragoa egin zait, agian ondo gertatuta nengoelako"

KANPAMENDUAK

"Ezer ez zegoen lekuan jartzen zuten kanpamenduan denetarik genuen"

Profesionalak izandako txirrindulari asko izan dira lasterketan?

Jalabert anaiak, Melchor Mauri, Mikel Astarloza, Cabestany, Olano... Gura dutena da lasterketa profesionalizatzea. Hasiera baten abentura kutsu handiagoa zuen lasterketa zen, baina orain oso profesionala da.

Bartzelonako talde batek antolatzen du; Paris Dakarren ibilitako jendea da, eta 20 urte daramatzate Marokon aktibitateak antolatzen.

Nolakoa izan da zuen egunerokotasuna?

Lehenengo eguna hotelean egin genuen, baina hurrengo guztiak kanpamenduetan izan ziren. Oso ondo antolatutako lasterketa da. Ezer ez dagoen toki baten jartzen dute kanpamendua eta denetik dago: dutxak, komuna, buffeta, medikuak...

Egunero mugitzen zituzten kanpamenduak. Gurekin batera irteten ziren eta gu iritsi orduko dena gertu zuten. Lur orotariko ibilgailuak, helikopteroa... denetik zegoen.

Ibili zarete bai Atlasean eta baita desertuan ere. Zer da gehien gustatu zaizuna?

Askorik ez dut ikusi. Menditsua da oso, hirugarren etapana 2.000 metrora igo ginen eta ikusgarria zen.

Non dago horrelako lasterketa bat bukatzearen gakoa?

2007an Parisen egon ginenean 1.200 kilometro egin genituen. Normalean, horrelako lasterketan egoten den jendearen batez besteko adina 40 urtetik gorakoa izaten da. Oso indartsua izatea ez da hain garrantzitsua; bai, ostera, erresistentzia izatea eta buruz gogor egotea. Etapa luzeak dira, hidratazioa garrantzitsua da, estomagoa, ipurdia... gauza horiek kontuan hartu behar dira.

Lasterketa bat baino gehiago, erronka bat dela esan daiteke?

Bai, hori da saldu gura izan dutena! Egia da oso onak direla saltzen. Eurek gura dutena da urtetik urtera gero eta gehiago izatea; adibidez, datorren urtean 500 parte-hartzaile izatea gura dute! Baina izenemateak balio duena kontuan hartuta ez dut uste horrenbeste jende izena emango duenik.

Erronkari dagokionez, bai, ni horregatik joan nintzen. Bost eguneko lasterketa, desertuan, orientazioa... bizi iraupena zela uste nuen, baina ez da horrenbeste izan. Goizean egiten genuen lasterketa, eta momentu haietan sufritzen genuen, baina arratsalde guztia primeran egoten ginen, lasai. Jan, egon, beste begiratu...

Zer da esperientzia honetatik nabarmenduko zenukeena?

Ezagutu dudana jendea; izan ere, horrelako lasterketan beti egiten dira lagunak. Arazorik ez dudanez izan, sentazio onarekin geratu naiz, berriro bueltatzeko gogoarekin. Baina beste modu batera bueltatuko nintzateke; taldean eta babesleekin.

Etapa askotan bakarrik joatea tokatu zait. Nire asmoa zen esperientzia bizi izatea, baina bigarren egunerako ikusi nuen hura lasterketa bat zela. Egia esan, inguruak ikusi eta disfrutatzeko denborarik ez dut izan.

Izan duzu kontatzeko moduko anekdotarik?

Pello Ruiz Cabestanyren logela berean egon naiz, eta, egia esan, artista hutsa da. Bestalde, lehenengo egunean jausi eta freno hautsi nuen; hortaz, freno bakararekin ibili naiz gainontzeko egunetan.

Bergarako txirrindulari elkarreko presidentea zara. Zer egiten duzue?

Orain dela gutxi zikloturista martxa bat antolatu dugu. Bestalde, domekero egiten ditugu irteerak; aurten, gainera, neskendako ere antolatu dugu, baina ez du arrakastarik izan. Urri ingururako beste lasterketa bat antolatuko dugu.



Garikoitz Arregi bizikletarekin entrenamendua egin ostean.

ARANTZAZU EZKIBEL

KIROLA > AUKERA EGITEA

Umeendako taldeko kirolak hautatzea gomendatu dute

Etorkizunak bakarkako kirol jarduerak egitera eramango gaituelako, Borja Moiua eta Josu Murgiondok taldeko kirolak aukeratzeko aholkatzen dute

LARRAITZ ZEBERIO > ARRASATE

Multikirola egiten dute ume gehienek haurtzaroko lehenengo urteetan. Aukeraketa egiteko unea iristen denean, ordea, zalan-tza handiak pizten dira umeen eta gurasoen artean. Futbola, pilota, igeriketa, txirrindularitza... aukera zabala da. Esperientziatik, Borja Moiua eta Josu Murgiondok lehenengo eta behin gauza bat argitzeko gomendioa egiten dute: bakarkako kirola ala taldeko kirola?

GAZTEENDAKO, TALDEKO KIROLA

Moiua eta Murgiondok taldeko kirola gomendatzen dute, ezbaierik gabe. Uste dute egungo ere-



Neska taldea areto futbola praktikatzen.

ARTXIBOA

duek indibidualismoa dutela oinarri eta diote bakarkako kirolak egiteko aukera etorriko dela etorkizunean ere.

Biek ala biek dituzte alde onak eta alde txarrak. "Bakarkako jarduerak onak dira pertsona helduak eta zailduak hezteko. Autonomoagoak eta konpetitiboagoak izango dira. Ez dago tal-

de estrategiarik eta entrenamenduak gogorrak izango dira, monotonoak", adierazi dute.

Umeendako taldeko kirolen aldeko apustua egiten dute: ludomotrizitateak, hau da, jolasak, garrantzia du, garaipen baten poza bikoiztu egiten da, eta porrota, aldiz, erdian geratzen da", adierazi dute.

HEZIKETA > AISIALDIA

Zelan aukeratu eskolaz kanpoko jarduerak

L.Z. > ARRASATE

Hezkuntza musikala, kirolaren praktika, hizkuntzen praktika... aukeran ditugun eskolaz kanpoko jarduerak asko dira gaur egun

eta gurasook, gehienetan, ez daki-gure seme-alaben agenda nola osatu.

Gaia ikertu dute Euskal Herriko Unibertsitateko Familia-

Psikologia Unibertsitate Zentroko Ainhoa Manzano eta Juan Luis Martin doktoreek.

Etxadi taldearen webgunean irakurri diegu ikerketa gehienek diotela eskolaz kanpoko jarduerak umei jarraikotasuna, ardura eta independentzia gartzatzen laguntzen dietela. "Beste era bateko harremanak izaten laguntzen die, autoestimua indartzen dute, eta garapen sozialerako aukerak eskaintzen dituzte", adierazten dute.

KONTUZ PRESIOAREKIN

Seme-alaben agenda egiterakoan adituek aholkatzen dute umeek eskolan egindako jardueraren baten inguruan interesa azaltzen badute, orduan euren adinera egokitutako programa bat bilatzeko interes hori gartzatzen.

Kontziente izan behar dugu, ordea, ez ditugula umeak gehiegi *presionatu* behar eskolaz kanpoko jarduerekin. Guraso askoren kezka izaten da hori. Umearen adinera egokitutako jarduerak aukeratzeko gomendatzen digute, eta umearen interesak kontuan hartzen dituztenak.



Arrasate Musikaleko ballet ikasle talde bat.

ARTXIBOA



Iñaki Olalde, Gipuzkoako Bertsozale Elkarteko transmisio eragilea.

GOIENA

Iñaki Olalde > Bertsozale Elkarteko kidea

"Umeek irudimena, hiztegia eta ahozkotasuna lantzen dituzte bertsoekin"

L.Z. > ARRASATE

Zortzi urte dira Bertsozale Elkarteak Gipuzkoan *Ahozkotasuna eta bertsojaritza* izeneko proiektua abiarazi zuela. Ikastetxeetan, hezkuntza arautuaren barruan, egiten dute eta 9.000 ume hartzen dute parte.

Zein da zehatz ikastetxeekin egiten duzuen lana?

Informazioa bidaltzen dugu ikastetxeetara edo eurak ipintzen dira gurekin harremanetan. Hamabost egunean behin joaten gara ikastetxera eta bertan ordubeteko saioa egiten dugu. Joatea tokatzen ez zaigun astean ikastetxeko irakasleekin lantzen dute bertsojaritza eskolako umeek. Ikastaro osorako egitasmoa da, eskola orduen barruan egiten dena eta astean ordubeteko dedikazioa eskatzen duena. Ikastetxearen, Udalaren eta Bertsozale Elkartearen arteko elkarlana da.

Zein helbururekin abiarazi zenuten egitasmoa?

Bertso eskoletarako zubi lanak egiteko sortu genuen. Duela zortzi urte etena egon zen; ume gutxiago etortzen ziren bertso eskolara eta desagertzen hasi zen.

Orain, baina, osasuntsu daude bertso eskolak, ezta?

Bai. Gipuzkoan bakarrik bertso eskolen bueltan dabil-tzan 9.000 lagun ditugu zenbata-ta. Erdia baino gehiago umeak eta gaztetxoak dira.

Ze onura ekartzen dizkio eskolako ume bati bertsojaritza lantzeak?

Jasotzen ditugun balorazioak oso onak dira. Bertsojaritza lantzerakoan beste gauza batzuk ere lantzen dira: ideiak, irudimena, hiztegia, ahozkotasuna... horiek guztiak lantzen dira. Ideiak esaldi bihurtu behar dira, esaldiak ordenatu egin behar dira. Jendaurrekoa ere lantzen da. Umeendako, orokorrean, oso aberasgarria da.

"Astean ordubeteko dedikazioa eskatzen du; gu hamabostean behin etortzen gara"

"Ideiak, irudimena, hiztegia, ahozkotasuna eta jendaurrekoa lantzen dira"

> HEZKUNTZA

Datorren ikasturterako martxan nahi dute eredu hirueleduna EAEko 40 ikastetxetan

Datorren ikasturteari begira eredu hirueleduna modu esperimentalean frogatu nahi duten ikastetxeek ekainaren 10era arte epea izango dute haien eskaerak aurkezteko.

Eusko Jaurlaritzak 445.000 euro inbertituko ditu horrenbeste zeresana eman duen eredu berria martxan ipintzeko. Jaurlaritzak iragarri du irakasle hirueledunak eta egonkorrak dituzten ikastetxeei lehentasuna emango diela.

Testu hauek osorik irakurtzeko eta erantzuteko, zatoz gure webgunera



guraso.com



> **PUNK JAIALDIA**
Oñatiko Errekalde auzoko jaietan, bost taldek jo zuten egubakoitzean > 30



> **EMON**
Bergarako taldeak jaietan aurkeztu zuen bere lan berria, txosnagunean > 31



> **BERGARA HIRIA**
Lehiaketara aurkeztutako 40 lan onenak Aroztegi aretoan daude ikusgai > 32

36KO GERRA > DOKUMENTALA

Aretxabaletako memoria historikoa berreskuratuz

ESPAINIAKO GERRA Memoria historikoa azaleratzeko, 36 eta 37ko gerran Aretxabaletan gertatutakoa jasoko du dokumental batek

GRABAKETAK Arrasaten bi pasarte filmatu dituzte; Intxortako trintxeretan eszena bat grabatzea ere gura dute

MAIDER ARREGI > ARETXABALETA
Guardia Zibilak eta militarrek Arrasateko Herriko Plaza eta Iturriotz kalea hartu zituzten. Sekulako ikusmina sortu zen herrian: dozenaka bizilagunek *Gerra zibila Aretxabaletan* dokumentala nola filmatzen zen ikusteko aukera izan zuten pasa den domekan. "Isilik, kamera, ekin!" zuzendariaren agindupean, Espainiako gerrako bi eszena grabatu zituen 20 laguneko lan taldeak. "Aretxabaletan 1936 eta 37an zer gertatu zen kontatzea du helburu dokumentalak", azaldu digu Juan Ramon Garai, Intxorta 1937 Kultur Elkarte kideak. Arteman Komunikazio enpresa eta Intxorta taldearen arteko elkarlana da. Gorka Etxabe, Artemaneko arduradunaren hitzetan, "asmoa da dauzkagun fikzio grabaketa historikoekin eta garai hartako lekukoek elkarriketekin doku-

mentala osatzea. Argazkiak eta elementu grafikoak ere erabiliko ditugu".

FRANKISTAK ARETXABALETAN
Gerra eta errepresioaren ondorioz, Aretxabaletan urtetan gordeta egon den historia azaleratu nahi dute. "Artemanekoekin bat egin eta letretatik irudira pasa gara. Benetan gertatutako historiaren bi pasarte grabatu ditugu. 1936an, urria eta azaroan, faxistek Aretxabaletan sartu eta pertsona zibilak atxilotu zituzten. Tartean, Bedoñako Elorrixa baserriko Dionisio Uribealago baserritarra. Orduan, Bedoña Aretxabaleta zen eta pentsatu genuen gertaera hori jasotzea dokumentalean. Arrasateko udaletxean zeuden ziegetara eraman zituzten atxilotuak, hori ere irudikatu dugu", azaldu digu Garai.

Grabaketetako bat Bidasoro baserrian egin dute. Izan ere, Elorrixa baserria guztiz herrituta dago egun; aldiz, Bidasorok orain dela 100 urte zeukan itxura berbera dauka. "Ama haurdun zegoela eta bederlatzi seme-alaben aurrean atxilotu zuten aita". Oso ondo gogoratzen du Jose Luis Uribealgok 1936an gertatu zena baserrian: "Lau urte terdi nituen baina guztia gogoratzen dut. Amak askotan kontatzen zidan eta, 18 urterekin, gertatutako guztia oroitu nuen bat-batean". Oso gogorra izan zela azaldu digu: "Kartzelan beldur handia pasa zuen aitak eta konfesatzen ere ez zioten utzi. Sorpresaz azaldu ziren frankistak eta aita eraman zuten ondoren fusilatzeke". Kandida, Dionisio Uribealgoren alaba, astoa hartu eta esnea saltzera Arrasatera jaisten zen. Herrian zegoela, bere aita preso, lotuta



Arrasateko filmaketan parte hartu zuten gazte batzuk, gustura. Jantziak eta materiala, Madrilen alokatutakoak dira. ARTEMAN



1939ko Ford kamioi gainean, Osoron Uribealgoren paperean. Autoa Maritxutako Komisiñuak erabiltzen duena da. ARTEMAN

ESANAK

"Ama haurdun zegoela eta bederlatzi seme-alaben aurrean, aita indarrez eraman zuten frankistek"

Joxe Uribealago > Lekukoa

"Hurbileko historia da eta generazio berriei jakinarazteko, azaleratzeko, proiektu polita da"

Jon Zubiaga > Aktorea

ikusitu zuen. Eszena hori ere jasotzen du dokumentalak. Lucio Oteizaren adierazpenak oso hunkigarriak dira. Oraindik ere malako ateratzen zaizkio hildako laguna gogoratzen duenean. Intxorta inguruan, bala galdu batek bete betean eman zion lagunari, eta Lucioen besoetan hilda erori zen.

GRABAKETAK IBARREAN

Mikel Arregi Arrasateko gaztetxe kidearendako sekulako esperientzia izan da: "Gaztetxeke 17 lagun batu ginen. Jolas baten moduan hartu genuen eta primeran pasa genuen". Arregik fran-

kisten jeneral nagusiaren papera egin du. "Sekula ez nuen pentsatuko nire burua horrelako jantzi baten barruan ikusiko nuenik; bitxia izan da *rol* hori betetzea, esperientzia polita benetan". 4 eta 13 urte bitarteko bederlatzi gazetxo arrasatearrek ere hartu dute parte. Jantziak eta gerra materiala Madrilan alokatuta ekarri dituzte. Elgetan zabaldu den erakusketan dauden fusilak eta pistolak ere erabili dituzte. Gainera, Intxortan egin berri dituzten trintxerak aprobetxatuz, Murun gertatutako pasarteak ere filmatuko dutela azaldu digu Etxabek.

Dionisio Uribealgoren papera, *Osoron*, Jon Zubiaga arrasatearrek egin du. "Erronka bat izan da; lehen aldia da horrelako paper gordina egiten dudana. Hurbileko historia da eta generazio berriei jakinarazteko proiektu polita. Oraindik erantzukizunak airean daude gainera. Joxe Uribealgoren begiradapean, errespetu handiz sartu naiz Dionisioen paperean".

Dokumentala urri aldera aurkeztuko dute eta DVD formatuan ere zenbait kopia kaleratuko dituzte. Egindako lana aprobetxatuta, liburu bat ere kaleratuko dute Aretxabaletan.

KRONIKA > PUNK FESTIBALA ERREKALDEN

Gandor festa bost orduko punk jaialdian

NON: Oñatiko Errekalde auzoa.**EGUNA:** Egubakoitza, maiatzak 21.**ZENBAT JENDE:** Plaza beteta.**IRAUPENA:** Bost ordu.

LANDER MUÑAGORRI > OÑATI

Errekaldeko jaietako lehen egunerako kontzertuen kartela potentia zen. Bost talde, eta beste hainbeste orduko festibalean, gandor eta kaskamotzak nagusitu ziren Errekaldeko enparantzan.

Kontzertuei hasiera emateko lanetan aritu zen Bitz punk rock talde oñatiarra. Emanaldi luzea ez izan arren, erantzun ona izan zuen jendearen aldetik.

Gaueko hamarrek pasatu berriren hasi ziren Golpe de Estado taldekoak euren emankizuna eskaintzen. Oñatiarren erritmo biziak zorrotz iritsi ziren entzuleen belarrietara, argi erakutsiz azken denboraldian teknikoki

aurrerapauso handia eman dutela. Sospechosos taldeko Naiara ere irten zen talde arrasatearrekin kantatzera.

Kañeria 13 arrasatearrek hartu zuten Golpe de Estadoren testigua. Giro ezinhobe sortu zuten ikusleen artean, *feedback* handia lortuz. Punk eta hardcore doinuak kantatuz aritu ziren bertaratu zirenak. Beste behin ere, Ulli abeslariak bereak eta bi egin zituen taula gainean. Bengalak piztu eta gaueko giroa berotzeko ardura berak hartu zuen.

70eko hamarkadako The Lurkers taldea izan zen taularatzen hurrena, bere garaian Ramones britainiarra bezala ezaguna egin zena. Emankizuna gaueko eskasena izan zen, entzuleekin hartu eman gutxien izan zuena. Euren ere ez zuten kontzertua behar bezala bizi izan, eta hori gertatzen denean, ikusleengana iristea zaila izaten da.



Egoitz eta Ulli, Kañeria 13-ko taldekideak, egubakoitzean eskaini zuten kontzertuan.

JOSETXO ARANTZABAL

Gaueko azken emankizuna izan zen 999 talde mitikoarena. Hasiera partean, kantu berriekin eta ezezagunekin hasi ziren, eta publikoa hotz agertu zen. Oste-

ra hasi ziren euren betiko doinuak eskaintzen eta ikusleen arreta bereganatzen. Hainbat izan ziren taula gainera igo eta abeslariaren batera kantuan aritu zirenak.

Aipatzekoa Nick Cash taldeko abeslariaren dinamika taula gainean. 70eko hamarkadatik hona urte ugari igaro badira ere, modu horretan mugitzea ez da gutxi!

KRONIKA > LEGEN BELTZA BERGARA ETA ARRASATEN

Domekako lepoko minak axola al du, bada?

NON: Bergarako gaztetxea eta Arrasateko 3 aretoa.**EGUNA:** Egubakoitza, maiatzak 21; eta zapatua, maiatzak 22.**ZENBAT JENDE:** 70 lagun inguru kontzertu bakoitzean.**IRAUPENA:** Ordu eta erdi inguru.

L.M. > BERGARA

Legen Beltza taldeko kideren bat edo beste lepoko minez esnatuko zen atzo ziurrenik. Izan ere, asteburu intentsoa eduki dute igaro berri dena, egubakoitz eta zapatuan kontzertu bana eskaini baitzuten. Bergarako gaztetxean izan ziren lehenbiziko, euren zuzeneko bortitzarekin; eta Arrasateko 3 aretoan, hurrengo egunean.

Kontzertu gordinak izan ziren azpeitiarrek asteburuko bi egunetan eskaini zituztenak. Trash metal eta death metalaren arteko doinuetan sakondu zuten hamairu kantutan zehar. Laister barru lan berria izango dute Legen Beltzako mutilek esku artean, baina horrek ez zien eragotzi aurrerapen kantu batzuk ikusleei eskaintzea.

Jo zituzten abesti berrietan betiko eran jarraitzen baldin badute ere, death metalak gaur egungoetan presentzia nabar-



Legen Beltzak Bergaran eta Arrasaten jo zuten. Argazkian, Bergarako kontzertua.

JOSETXO ARANTZABAL

mendagoa dauka. Legen Beltzaren kantutegi berri honek erantzun aparta izan zuen Bergaran eta Arrasaten bildu ziren ikus-

entzuleen artean, kontzertuak berak bezalaxe.

Nabaria da eman duten aurrerapausoa: apaingarriak alde bate-

ra utzi eta soinu bortitzagoa lortu dute. Eta hori guztia bost kantu berri soilik jo zituztela kontuan hartuta.

LEGEN BELTZA Z GAIN, GEHIAGO

Sua, argia eta death metal nordikoa

Asteburuan zehar, ordea, ez zen Legen Beltza azpeitiarra bakarrik aritu, kontzertu bakoitzeko bi taldek lagundu baitziren, Bergaran zein Arrasaten.

Egubakoitzeko saioan Dark Code bergarra aritu zen, hasteko eta behin, ikusleen belarriak berotzen. Kontzertu aparta eskaini zuen eta, talde gaztea izan arren, etorkizunean zer eskaini izango dutela garbi dago.

Childrain eta euren ikuskizunak jarraitu ziren ondoren. Egiten duten musika baino ikuskizunak dauka hemen garrantzia handiagoa. Suak eta argiteriak egiten duten musikari esparrua jaten die.

Zapatuan Darkness by Oath arrasatearra aritu zen Legen Beltzaren aurretik. Azpimarratzekoa da hauen jarduna, Euskal Herrian apenas jorratzen den death metal nordikoa jotzen baitute. Estilo honetan, doinu gogorrek melodikoarekin partekatzen dituzte.

Hauen ondoren, The Descendek jo zuten, Darkness by Oath bezalaxe death metal nordikoa jorratzen duen taldea.

EMANALDIA > HELDUENTZAKO SAIOA

Paula Carbonell ipuin kontalaria Pol-Polen

Helduei zuzendutako '¿Mal o bien de amores?' kontakizuna eskainiko du datorren egunean. Ekitaldia Oihulari Klownek antolatu du.

LANDER MUÑAGORRI > BERGARA

Paula Carbonell Cuencako ipuin kontalaria Bergarako Pol-pol tabernan izango da datorren egunean. Oihulari Klown antzerki taldeak antolatu du ekitaldia. Urtero bezala, Euskal Herriko txoko ezberdinetan ahozko narrazio zirkuitua antolatu eta bultzatzen dihardu, eta 2009-2010 kurtsoari jarraipena emanez egongo da Carbonell Bergaran. Maiatzaren 27ko saioan helduentzako kontakizuna egingo du, *¿Mal o bien de amores?* ipuinarekin.

Carbonellek hainbat alor jorratuko ditu bere emanaldian: amodioa, fidelitasun gabezia, maitatzeko era ezberdinak edota maitasunaren bidez sentitu daitekeen guztia.

IPUINAK, DENENTZAT EZBERDIN

Carbonell urte luzez dabil adin talde ezberdinentzat ipuin kontalari bezala, irakasle bezala lan egiteaz gain.

Berak dioen bezala, ipuinek ez die pertsona guzterie era berean eragiten. Zentzu horretan, kontakizunak arroparekin alderatzen ditu: "Pertsona bati oso ondo gera dakioke jantzi bat; aldiz, besteren bati, oso gaizki". Eta ipuin batekiko inork emozioa sentitzen baldin badu, orduan ipuin hori ezin hobeto doakio. Baieztapen honi garrantzi handia ematen dio Cuencako ipuin kontalariak, "emozionatzen ez nauen ipuin bat ez baitut sekula kontatuko". Datorren egunean emozioz jardungo da, beraz.



Paula Carbonellek urte asko daramatza ipuin kontalari gisa.

GOIENKARIA

XII ANTIGUA LEHIAKETA

Ganbara Txiki bigarren sailkatu da

Lau abesbatzak hartu zuten parte, eta Bartzelonako Vivaldi gailendu zen

L.M. > OÑATI

Ganbara Txikik zapatuan abesbatzen lehiaketa batean bigarren hartu zuen parte. Zumarragan izan zen, Antiguako lehiaketan, eta bigarren sailkatua izan zen, Bartzelonako Vivaldi abesbatza-aren ondoren.

Aitor Biainek zuzentzen duen koruaren emanaldia lau kantuz osatu zen: *Laudate Dominum* (Javier Busto), *Angelus* (Josu Elberdin), *Uraren besotik* (Eva Ugalde), eta *Habaneras de Carnaval* (David Azurza). Azken pieza honekin, Torrevejiako Habanera Txapelketa irabazi zuen Oñatiko abesbatzak; zapatuan, bigarren saria eman zion.

KRONIKA > EMON TALDEA BERGARAN

Emon, dantza eta jaia taula gainean

NON: Bergarako txoznetan.

EGUNA: Egubakoitza, maiatzak 21.

ZENBAT JENDE: Txosnagunea beteta.

IRAUPENA: Ordu eta laurden inguru.

L.M. > BERGARA

Gaztetasuna da Bergarako Emon taldearen bereizgarrietako bat, eta gazteriak ongi erantzun zien pasa den egubakoitzean. Euren herrian zeukaten zuzeneko emanaldia, disko aurkezpen birako bigarren kontzertua -Tolosako Bonberenean emandakoaren ondoren-. Taldekietzat berezia izan zen inondik ere egubakoitzeko saioa. Horrek urduritasuna zekarren berarekin, eta uneren baten hori sumatu bazen ere, berehala joan ziren nerbio guztiak eta, azkenetako, zeukaten guztia eman zuten.

Ikus-entzuleek txosnetako karpa bete zuten, Emon taldearen doinuekin gozatu ederra hartuz. Lehen lerroetan dantza eta mugimendua etengabea izan zen. Emanaldiaren puntu gorena, halere, amaieran izan zen: iragan urtean txosna batzordearentzako kaleratu zuten kantua jo zuten, ikusleen gozamenerako. Kontzertuan zehar, birritan eskaini zuten kantua, birritan ikusle goa dantzaz.



Haritz, Oihane eta Joanes egubakoitzeko kontzertuko momentu batean.

JOSETXO ARANTZABAL

Trikitia, folka, reggaea, ska, funky edo rock doinuak nagusi dira talde bergararren. Zortzi pertsonen osatzen duten taldea da, eta horrek zuzenean eragiten du estilo nahasketa horretan.

Musika estilo ezberdinak jorratzeaz gain, kantuen gaiak ere

orotarikoak dira. Hala, *Piztu Herria* kantuarekin, egungo egoera honetan aurrera egiteko arrazoiak eman zituzten; larunbat gaueko istorioak, *Aurrera* piezarekin; *5. eremutik* abestian, Guntanamoko egoera salatu zuten; eta egurra banatu *Lerro zuzena*, *Iza-*

teko eta *Izan zu*-n. Disko aurkezpena izaki, lan berriko kantutegi guztia eskaini zuten, hainbat bertsiok gain.

Adi beraz lagunok, Emon taldearen zuzeneko izerditsu eta dantzagarriak udan herriz herri egongo baitira!

> EUSKOVISION

Eurovision jaialdia lagunartean ikusteko deialdia, zapatuan

Datorren zapatuan, Eurovision lehiaketa izango da, Oslon. Baina Elgeta ere bertan presente egongo da, Espalioa Kafe Antzokian antolatu duten Euskovision hitzorduekin. Jende artean, lehiaketaren inguruko komentarioekin ongi pasatzea dute helburu. Pasa den urtean ere antzeko esperientzia bat egin zuten, baina kasu horretan Internet bidez soilik. Ekitaldiaren antolatzaileak *sustatu.com* eta *lapersonnalite.com* webguneak dira.

> HITZALDIA

Udako solstizioaren inguruko hitzaldia Bergaran

Hitzaldia eskainiko du Bergarako kultur etxean Aritza Bergara idazle eta kultura sustatzaileak. Udako solstizioa aitzakiatzat hartuz, orain dela urte gutxira arte indarrean zeuden sinismenen berri emango du, gaur egungo gazteek horien inguruan ezer gutxi baitakite. Udako solstizioa abiapuntu, hitzaldiaren helburua horren inguruko ezagutza zabaltzea eta esanahia ezagutaraztea da. Hitzaldia datorren ekainaren 22an izango da.

ARGAZKIGINTZA > BERGARA HIRIA

250 lagun pasa dira Aroztegitik asteburuan, argazkiak ikustera

Bergara Hiria argazki lehiaketako parte-hartzeak eta lanen kalitateak gora egin du eta emaitza borobila da bisitari kopuruari dagokionez ere

GOIATZ ARANA > BERGARA

Aurreko urteetan ez bezala, oraingoan, Pazkoekin batera egokitu da Bergara Hiria argazki lehiaketako lanen erakusketa Aroztegin, eta jendeari gustatu egin zaio. Hala kontatu digu Udalarari lehiaketa antolatzen lagundu dion Pol-Pol argazki taldeko Joseba Leturiak: "Inoiz baino lan gehiago aurkeztu dituzte aurten lehiaketara eta kalitatea izugarria da. Egubakoitzetik domekara bitartean Aroztegi aretotik pasa direnek txalotu egin dute erakusketa; oso polita geratu da".

SARI BANAKETA

Bariku arratsaldean egin zuten sari banaketa ekitaldia, Aroztegi aretoan, Agurne Barruso alka-



Bariku arratsaldean banatu zituzten sariak.

JOSETXO ARANTZABAL

tea eta Enara Minguez Kultura zinegotzia bertan zirela. Elorrioko, Eibarko Club Deportivoko eta Ortzadar argazkilari elkarte-
etako kide banak osatu dute aurtengo epaimahaia. Sei lan aukeratu dituzte: koloretan hiru eta zuri-beltzean beste hainbeste. Irungo Andres Indurainen *Parada y silencio* lanak eta Felix Idigoras bergararraren *La Calle* obrak eskuratu dituzte lehen

sariak, zuri-beltzean eta koloretan, hurrenez hurren. Herriko sariak, bestalde, Jose Agustin Gurrutzagaren *Pasiego* zuri-beltzean eta Joseba Leturiaren *Rajasthan* koloretan obrek eraman dituzte.

Bariku arratsaldean sariak banatuta, irekita dago Bergara Hiria lehiaketako 40 enonen mostra. Datorren domekara arte egongo da zabalik.



40 bat eskultura daude ikusgai, Oñatiko kultura etxean.

JOSETXO ARANTZABAL

ESKULTURA > 'ITZARRI'ERAKUSKETA

Esteban Kerexetaren eskulturak ikusgai

Oñatiarrak material ezberdinez egindako 40 bat lanek osatzen dute kultura etxeko erakusketa

G.A. > OÑATI

Zabalik dago Esteban Kerexetaren oñatiarraren erakusketa; egubakoitz arratsaldean ireki zituen ateak, kultura etxean. Material ezberdinez egindako eskulturak dira 40 ingurugehienak espresuki Oñatiko erakusketa honetarako egindakoak, gainera. Asteburuan kultura etxetik pasatako herritarrek ezagutu dituzte jada Kerexetaren lanak, eta hala

egin ez dutenek ekainaren 6ra arte izango dute horretarako aukera, astelehenetik domekara, 18:00etatik 20:00etara.

ESKULTURGINTZARAKO JAUZIA

Ibilbide luzea egin du Kerexetaren eskulturgintzan; argazkigintzatik egin zuen eskulturgintzarako jauzia, bolumenaren bila. Material ezberdinak landu eta askotariko gaiak jorratzen ditu.

KIROLA > OSAGARRIAK

Pultsometroa erabiltzen

DABID BEREZIBAR

Aspaldi egiten genituen entrenamendu saio haiek atzean geratzen ari dira; hots, sentazioen bidez korrika egitea, zein erritmo edo intentsitatean ari garen jakin gabe eta adierazle bakarria izerdia eta arnas estua zirela. Hori egiten genuen, gainera, pentsatuz esku-muturreko erloju-aparailuak profesionalentzako baino ez zirela. Gaur egun, jende askok eta askok erabiltzen du pultsometroa, eta esango nuke oraindik ere gehiago erabili beharko litzatekeela.

ZERGATIK ERABILI

Oro har, pultsometroak balio du jarduera fisikoa objetibotasunez, era kontrolatuagoan eta osasuntsuago burutzeko. Baina beste hainbat gauzatarako ere bai.

- Ariketaren intentsitatearen kontrola ematen digu: bihotz maiztasuna, denbora, abiadura...

- Entrenamendu espezifikokoak burutu eta eremu konkretuetan mugitzeko adierazleak ere.

- Momentu askotan gure mugak gaintzen ari garela abiatzen digu.

- Entrenamendu osasuntsua egiteko baliogarria da.

- Norbere buruarekin lehiatzeko era bat ere bada.

Pultsometroa erabiltzen hasi aurretik norbere gorputzaren gaitasun eta mugak ezagutzea komeni da: bihotzaren gaitasun gorena, eraman beharreko erritmoak, intentsitate eremuak, nola entrenatu... Hori guztia mediku azterketa pasatuta lor dezakegu.

DATU BATZUK

Pultsometroak, orokorrean, oinarriko datu batzuk emango dizkigu:

Gorputzaren mugak ezagutzea komeni da pultsometroa erabili aurretik

- Jardueran zehar momentuko bihotz taupada kopurua.

- Ariketa guztian zehar emandako bihotz maiztasun balio gorena eta batez bestekoa.

- Ekintzak iraun duen denbora guztian, bost segundoro, gure bihotza zein taupadatan egon den.

- Zenbat kaloria erre ditugun; pisua galdu nahi bada, balio interesgarria.

- Datuak ordenagailuan gordetzeko aukera izanez gero (programa eta interfazea behar dira), entrenamenduen denboraldiak, kontrola, kurbak... lortuko ditugu.

MARKAK ETA PREZIOAK

Merkatua zabala da kasu honetan ere. Marka asko daude (Polar, Garmin, Suunto, Cardiosport, Nike...) eta prezio anitz (30 eurotik hasita 500 eurora artekoak). Eman nahi diogun erabileraren arabera (korrika, bizikleta, igeriketa, mendia) eta behar ditugun funtzioei begira aukeratu beharko genuke pultsometroa.



Polar RS 800 pultsometroa: erloju, banda eta GPSarekin.

ARIZMENDI

ENTRENAMENDU EREMUAK

- % 50 - 60 artean: errekupeazio erritmoa.

- % 60 - 70 artean: gantzak erretzeko intentsitatea.

- % 70 - 80 artean: oinarriko erresistentziaren hobekuntza.

- % 80 - 90 artean: atalase anaerobikoaren entrenamendua; mistoa.

- % 90 tik gora: entrenamendu anaerobikoa.

Karvonen-en formula: eremu bakoitzari dagokion norberaren bihotz maiztasuna (Bm) ematen du. Horrela ateratzen da:

(Bm gorena - Bm basala) x 0,6 edo 0,7 edo 0,8 ... + Bm basala

30 urteko pertsona batek atsedenean 60 taupada izanik, % 70-80ko eremuan entrenatu nahi bada, zein intentsitatean jardun beharko lukeen kalkulatzeko:

(220-30) - 60) x 0,7 + 60 = 151 taupada minutuko (%70)

(220-30) - 60) x 0,8 + 60 = 164 taupada minutuko (%80)

Emaitza izango litzateke 151 eta 164 taupada arteko intentsitatean entrenatu dezakeela.

Atal honetan...

Astero-astero, Arizmendiren eskutik, intereseko gaiei buruzko aholkuak.

Arizmendi ikastola **2.0 PROFESIONALAK**

ARIZMENDI IKASTOLAREN LANBIDE HEZIKETA

GURE TALDEAK

Xasta



Ezkerretik eskuinera, Natxo, Maik, Luzu eta Pena.

XASTA

"Musika 'kañeroaren' hutsunea dutenengana heldu gura dugu"

Xasta taldeak izen bereko diskoa kaleratuko du ekainaren 4an; Koldo Sagastumerekin grabatu eta masterizazioa Coruñan egin dute

Taldea sortu zutenean, 2002an, bertsioak egiten hasi ziren, baina disko berrian eurek konposatutako hamar kantu grabatu dituzte

MIREIA BIKUÑA > ARRASATE

Xasta taldeak izen bereko diskoa kaleratuko du ekainaren 4an. *Maik-ek*, *Pena-k*, *Luzu-k* eta *Natxok* osatzen dute taldea eta eurekin egin dugu berba lan berriaren aurrerapena egin diezaguten. Metal-rocka da lanaren oinarria.

Disko berria grabatu duzue. Nolako da?

Ederra! Diskoa hamar abestik osatzen dute eta *Xasta* izena dauka. Taldearen izena jarri dugu, disko hau konposatzen duten hamar abestiek benetan erakusten dutelako zer den *Xasta* eta zer musika egiten dugun. Eta, diskoaren lehenengo abestian azaltzen dugun moduan, *erritmo biziz eta garrasi sakonez* betetako diskoa da.

Metal-rocka lantzen duzuela esan dezakegu?

Saiatzen gara musika *kañeroa* egiten, erritmo sakon eta biziekin eta ahots gogorarekin. Ez dakigu gure doinua metal-rockaren barruan sar dezakegun, baina garbi dugu *egurra* ematen ahalegintzen garela.

Askotariko gaiak daude hamar abestietan. Bakoitzak istorio bat dauka, baina onena diskoa entzutea da.

Nortzuegana heldu gura duzue zuen musikarekin?

Musika *kañeroa* falta duten guztiengana. Badirudi azken boladan metal musika ez dagoela inon entzungarri. Gure ustez, jende askok honen beharra du eta haiengana heldu nahi dugu.

Garzteagoak ginenean metal musika pil-pilean zegoen eta horren influentziarekin jaio ginen. Gaur egungo egoera guztiz ezberdina da, oso zaila da metala, heavya edo hardcorea egiten duten talde berriek aurrera egitea.

Non grabatu duzue diskoa?

Diskoa gure lokalean grabatu genuen. Krisiaren eraginez, guk geuk grabatzea erabaki genuen. Vice-presidentes taldekoek alboko lokalean entseatzeko utzi ziguten. Horrela eraiki genuen gure estudio txikia.

Koldo Sagastume ibili da teknikari. Bueno, teknikari, aholkulari, diseinatzaile... Azkenik, masterizazioa Metromastering estudioetan egin dugu, Coruñan.

Diskoa ekainaren 4an kaleratuko dugu eta salmenta puntuak www.myspace.com/xastametal webgunean ipiniko ditugu.

Noiz aurkeztuko duzue diskoa Debagoiengan?

Ba, oraindik ez dakigu. Kontzertuak lotzea oso zaila da, baina ahalik eta azkarren aurkeztuko dugu diskoa Debagoiengan. Oraingoan, badakigu ekainaren



Metalaren mila kolore jasotzea ez da erraza

Xasta taldea Gasteizkoa da, baina taldekideetako batzuek Arrasaten dute oinarrietako bat; eta esango nuke hori agerian gelditzen dela kasualitatea izan edo ez. Hain zuzen ere, metal rapeatua egiten duten arren, tar- teka Brutal Melodyren indarra edo Angerren ukitua gogora ekarri dizkidate; eta baita, Rage Against The Machine ere, jakina.

Indartsua, bortitza eta irmoa da euren eskaintza, baina, horrez gain, ukitu bereziak ematen dizkiete kantuei. Metalarendako beste leihotxo bat!

Iker Barandiaran

4an Gasteizko Jimmy Jazz aretoan zuzeneko egingo dugula, Governors taldearekin. Lerrook aprobetxatuko ditugu edozein lekutan zuzenekoak egiteko prest gaudela esateko... Gure diskoa erakutsi gura dugu Euskal Herriko bazter guztietan.

Nolakoak dira zuen zuzenekoak?

Guretzako eztanda bat bezala da, momenturik gozagarriena. Oso garrantzitsu ikusten dugu grabatutako agertokian ganoraz defendatzea. Hori horrela, zuzeneko bakoitzean %100 ematen dugu. Kontzertuetako helburua ondo pasatzea da.



Noiz sortu zen taldea eta zergatik?

Taldea 2002ko udan sortu genuen. Hasieran, denbora-pasa moduan hasi ziren. Pentsatzen dugu beste talde guztien antzera hasiko ginela: lokalean entseatzeko, bertsioak jotzen eta ondo pasatzen. Ondoren, kide berriak heldu ziren eta beste batzuek alde egin zuten, oraingo lauokoa osatu arte. Orduan, bertsioek abesti berriei lekua utzi zieten. Dena den, bertsioak beti ditugu labean, gertu.

sudokua

	8	4		7	5		
1		2		5	8		
			4	1			
7					3		
	8	7		3	9		4
	6	3		9	7	2	8
			5				8
	6	8			2		
8				6		7	

bila-bila 7




hitz gezidunak

	Amerikako aintzira	Ezaugarri	Australiako ugaztunak
	Are gehiago	* Xabier, idazlea	Espainiako ibaia
	Ez du ikusten		
	Lehor, idor		
Barazki mota	Sexuari dagokio		
Ez ilun	Gizon izena	Zaurituak garraiatzeko	
		Kolore goibel	
Bikoitza			Ikatzaren hasiera
Gurbitza			Tente
			Omen
Musika nota	Gabezia garai		
Lurpeko igarobide	Bokala		
		... gabe, atertu gabe, eten gabe	

GOIENKARIA

soluzioak



X	S	D	X	C	U	V	N	N	M
H	S	V	R	S	U	R	S	D	E
M	P	O	M	A	O	V	I	M	O
J	K	A	V	S	U	K	A	J	Z
A	R	A	N	D	R	A	X	E	L
A	E	L	E	T	E	M	X	V	Y
I	O	P	R	W	X	H	I	E	I
D	X	D	F	K	E	J	W	D	L
A	D	A	T	E	A	D	A	G	G

Hieroglifo: Bizia.

hieroglifo

Jaiotzen garenean hasten duguna.



hizki salda

Bost asteroide.

G	A	L	A	T	E	A	D	A
L	X	D	F	K	E	J	W	D
E	I	O	P	R	W	X	H	I
Y	X	M	E	L	E	T	E	A
A	L	E	X	A	N	D	R	A
Z	F	T	Y	S	U	K	A	J
A	S	I	M	O	V	P	O	M
D	E	S	U	R	S	A	H	P
M	N	V	U	C	X	D	S	X

8	2	5	1	3	6	4	7	9
9	1	6	8	7	4	2	5	3
3	4	7	9	5	2	1	8	6
4	6	3	5	1	9	7	2	8
2	5	8	7	6	3	9	1	4
7	9	1	2	4	8	3	6	5
5	7	9	4	8	1	6	3	2
1	3	2	6	9	5	8	4	7
6	8	4	3	2	7	5	9	1

I	V	I	T	L	E	N	N	T
E	N	Z	E	R	E			
A	Z	B	I	U	B	I	K	K
K		N	K	U	N	B	I	B
A	N	D	A			A	R	G
A	L			X	E	S	E	O
A				S	U	A		
O				A	R	E	A	
K				T	E			

asteko horoskopoa

ARIES martxoak 21-apirilak 21

Zure arazoak konpontzeko irtenbideak bilatu eta garatzeko aukera emango dizu aste honetan izango duzun pazientziak.

TAURUS apirilak 22-maiatzak 21

Zure alderdi tekniko eta praktikoan eman lehenetsia. Ez arduratu ezustekoak eta arazoak lehenengotan konpontzen ez badituzu, bigarren saiakeran egingo duzu. Kontuz zori jokuekin, ez da aro ona.

GEMINI maiatzak 22-ekainak 21

Eraginkortasuna, kontzentrazioa eta emaitzak, hori da jarraitu beharreko bidea une honetan. Lagundu behar dutenei eta zuk ere laguntza eskatu.

CANCER ekainak 22-uztailak 22

Bogan ez dauden baloreak defendatu beharko dituzu, eta horretarako, sentimenduak alde batean utzi beharko dituzu. Sexu harremanetarako egun oso onak.

LEO uztailak 23-abuztuak 22

Zure izaeraren alderdi on batzuk besteei erakutsi nahiko dizkiezu eta euren arreta piztuko duzu. Kontuz lan asko egitearekin, estresa sor dezake.

VIRGO abuztuak 23-irailak 22

Dena zehaztasunez aztertzeke daukazun gaitasunak lagunduko dizu aste honetan zure helburuak lortzen. Lagunak behar bezala tratatu.

LIBRA irailak 23-urriak 22

Azaleratu zure interesak eta familia barruko arazoak. Zuk ezagutzen dituzu inork baino hobeto eta horregatik oso lagungarria izan zitezke. Irten kalera eta adierazi zaitzez askatasun osoz.

SCORPIUS urriak 23-azaroak 22

Bideratu zure indarra adierazpide berriak sortzera. Ez izan zure ideien sakontasunaren beldur, ideia paregabeak izan ditzakezu-lako.

SAGITARIUS azaroak 23-abenduak 21

Oso ondo dago ideia onak izatea, baina hori ez da nahikoa, praktikan jarri behar baitituzu. Helburua + Zehaztasuna = Emaitzak.

CAPRICORNIUS abenduak 22-urtarrilak 20

Zure asmoak nahiko motel dabilta, eta orain une egokia da hausnartu eta zenbait gauza berrikusteko, hankasartzerik ez egitekotan behintzat.

AQUARIUS urtarrilak 21-otsailak 20

Gauza askotan parte hartzen duzun arren ez zara ezertan erabat murgiltzen. Une honetan badakizu zer nahi duzun eta lortuko duzu.

PISCIS otsailak 21-martxoak 20

Zure ideietan galtzeak ez zaitu lagunduko benetan bilatu eta nahi duzunean. Izan zintzoa zeure buruarekin eta borrokatu zure helburuen alde.

jaiotakoak




Ixone Aldea Aberasturi
Oñati >3,300 kilo. Maiatzaren 14an. Gurasoak: Eider (Oñati) eta Rafa (Oñati). Argazkian, Ixone jaioberria, aita eta amarekin.



Unai Hernandez Herreros
Bergara > 3,570 kilo. Maiatzaren 15ean. Gurasoak: Helena (Bergara) eta Jose Luis (Bergara). Argazkian, Unai jaioberria, aitarekin.



Unai Askasibar Herrera
Oñati > 3,450 kilo. Maiatzaren 16an. Gurasoak: Rosa (Oñati) eta Iñigo (Oñati). Argazkian, Unai jaioberria kumatxoan lotan.



Izadi Otaduy Bengoa
Revilla de Herran (Burgos) > 2,100 kilo. Maiatzaren 16an. Gurasoa: Amaia (Revilla de Herran). Argazkian, Izadi jaioberria.



Ane Beistegi Alvarez
Bergara > 3,580 kilo. Maiatzaren 16an. Gurasoak: Maite (Bergara) eta Aritz (Bergara). Argazkian, Ane jaioberria kumatxoan.



Maddi Lizarralde Ruiz de Zarate
Arrasate > 3,360 kilo. Maiatzaren 15ean. Gurasoak: Ane (Arrasate) eta Mikel (Arrasate). Argazkian, Maddi jaioberria, lotan.



Aitor Auzmendi Berezibar
Arrasate > 3,420 kilo. Maiatzaren 14an. Gurasoak: Itsaso (Arrasate) eta Aritz (Arrasate). Argazkian, Aitor jaioberria, kumatxoan lotan.



Enara Gisasola Sevillano
Bergara > 3,510 kilo. Maiatzaren 14an. Gurasoak: Natalia (Bergara) eta Unai (Bergara). Argazkian, Enara jaioberria, aita eta amarekin.



Danel Zubiaste Kristobal
Aretxabaleta > 4,130 kilo. Maiatzaren 18an. Gurasoak: Alaitz (Aretxabaleta) eta Urtzi (Aretxabaleta). Argazkian, Danel jaioberria, lotan.



Iker Joaquin Arce
Arrasate > 3,850 kilo. Maiatzaren 18an. Gurasoak: Belen (Arrasate) eta Ignacio (Arrasate). Argazkian, Iker jaioberria, kuman.



Maialen Larrañaga Elejalde
Bergara > 3 kilo. Maiatzaren 17an. Gurasoak: Josune (Arrasate) eta Ager (Lekeitio). Argazkian, Maialen jaioberria, kumatxoan lotan.



Maddalen Alberdi Gabilondo
Azpeitia > 3,900 kilo. Maiatzaren 17an. Gurasoak: Aizpea (Bergara) eta Josu (Azpeitia). Argazkian, Maddalen jaioberria, amarekin.



Unai Otero Conejo
Arrasate > 3,580 kilo. Maiatzaren 17an. Gurasoak: Manoli (Arrasate) eta Ismael (Bergara). Argazkian, Unai jaioberria, kuman lotan.



Josu Larrañaga Alvarez
Bergara > 3,800 kilo. Maiatzaren 19an. Gurasoak: Leire (Bergara) eta Iñigo (Bergara). Argazkian, Josu jaioberria, Ama eta ahizpa Irenearekin.



Julen Castro Castro
Antzuola > 2,600 kilo. Maiatzaren 19an. Gurasoak: Iosune (Bergara) eta Manu (Antzuola). Argazkian, Julen jaioberria, gurasoekin.



Eider Hervas Etxeberriarteun
Oñati > 3,380 kilo. Maiatzaren 19an. Gurasoak: Jasone (Oñati) eta Antonio (Oñati). Argazkian, Eider jaioberria, amarekin.



Paul Lasa Tirados
Arrasate > 4,030 kilo. Maiatzaren 19an. Gurasoak: Amaia (Arrasate) eta Juan Luis (Arrasate). Argazkian, Paul jaioberria, kuman lotan.



Rosana Lunca
Arrasate > 3,300 kilo. Maiatzaren 19an. Gurasoak: Livia (Errumania) eta Cosmin (Errumania). Argazkian, Rosana jaioberria, amarekin.



Mikel Kortabarría Noain
Oñati > 3,560 kilo. Maiatzaren 20an. Gurasoak: Oihana (Ordizia) eta Iñaki (Oñati). Argazkian, Mikel jaioberria, kumatxoan.



Ekain Davila Gonzalez
Arrasate > 3,680 kilo. Maiatzaren 20an. Gurasoak: Joana (Aretxabaleta) eta David (Arrasate). Argazkian, Ekain jaioberria, kumatxoan.



Amaior Kortabarría Iturbe
Aretxabaleta > 4,030 kilo. Maiatzaren 20an. Gurasoak: Aitziber (Aretxabaleta) eta Arkaitz (Elorrio). Argazkian, Amaior jaioberria, lotan.



Alaitz Izurtegi Barandiaran
Arrasate > 3,200 kilo. Maiatzaren 19an. Gurasoak: Amaia (Arrasate) eta Luis (Arrasate). Argazkian, Alaitz jaioberria, kuman.



Aiert Sologaistoa Zubia
Oñati > 3,570 kilo. Maiatzaren 19an. Gurasoak: Itziar (Oñati) eta Mikel (Oñati). Argazkian, Aiert jaioberria, kumatxoan lotan.



Madi Mondragon Moreno
Antzuola > 3,780 kilo. Maiatzaren 18an. Gurasoak: Maia (Arrasate) eta Ibai (Bergara). Argazkian, Madi jaioberria, kumatxoan lo.

BABESLEA

IKUSI MAKUSI
Umeen paradisia

Lazarraga 4 OÑATI 943 08 23 32

Joseba Olagarai > Aktorea eta kazetaria

"Ez dakit zer izan nahi dudan; ezta nahi ere"

JON BEREZIBAR > ARRASATE

Goenkale eta herriko plazaren artean telebista pantaila dagoela sarri ahaztu ohi dute askok. Olagarai (Etxalar, 1984) dio, hori, zenbaitzuk fikzioa eta errealitatea bera nahastea, lan ona egiten dutela esan gura duela. Hala ere, berari gaiztoarena egitea tokatu zaio Arralden eta asko gerturatu ei zaizkio kalean kontu eske.

Goenkale-n gaiztoa izatea kalean gero ordaindu egiten da, ez?

Denboraldiko gaizto ofiziala izango nintzela ohartarazi zidaten aurrez. Jendeak edozer esaten dit kaletik, ez natzaie batere ongi erortzen eta ez naute ikusi ere egin nahi.

Fama txarra ala ona, baina fama azken finean?

Zenbait egoerek agobiatu ere egin naute. Aurrekoan Donostian zebra-bidean emakume bat gerturatu eta esan zidan "Zein gaiztoa zaren eta faltsua!" eta ospa egin zuen.

Oso gaztetan hasi zinen zure herriko telebistan, ezta?

15 urterekin hasi nintzen Ttipi-ttapan, pentsatu gabe hura nire ogibidea izan zitekeenik. Lehenengo elkarrizketa auzokoari egin nion, kontrabandoaz. Telebistan egindakoaz gogoratzean konturatu naiz ze ondo pasatu eta zenbat lagun egin ditudan.

Telebistan hainbeste urte egin eta Youtube-n zure izena sar-

tuta lehenengo emaitza zuzen-ean aukeratik erori zinenekoa izatea ere!

(Barre) *Betizu*-ko zuzeneko lehiaketan izan zen eta jende guztiak komentatzen dit oraindik. Ikaragarri disfrutatzen nuen saio horrekin, abentura hutsa zen. Pena izan zen kentzea. Umeekin oso ondo moldatzen naiz.

...eta magisteritza ikasten zabilta.

Ez dakit horregatik den edo... udan begirale izango naiz, adibidez. Ez dakit zer izan nahi dudana: irakasle, aurkezle, kazetari, erreportari... ezta nahi ere. Bizitza gustatzen zait eta ea bizitzak nora eramaten nauen. Aurrez erabakiko banu zer izango naizen... uste dut frustrazio handia izango nukeela.

Garai baten nafarrek "inbaditu" egin zenuten ETB. Ia hasita geunden bertze eta bortz esaten.

Unibertsitatera Bilbora joan eta guztiak esaten zidaten: "Ala, Estitxu Fernandezek bezala hitz egiten duzu!". (Barre).



Joseba Olagarai.

OIHANE ISASI

ai, ene!



Informatikarientzako

Dirudiena baino askoz praktikagoa da argazkiko poltsa: halako bat daramaten informatikariei ordenagailuko tekla- ren bat hondatzen bazaie edo galtzen badute, poltsatik dago- kiona kendu eta listo; arazoa, konponduta.

<http://ttiki.com/13560>

biharamuna

iñigo Biain


Adierazpen kaxkartasuna

Apirilaren 12ko goizean euskaldun guztiok nahi eta espero genuen berria jaso zuten gure inguruko komunikabide guztiak (Euskaldunon Egunkariak eta Eginek ezik, noski). Bai, Egunkariaren auzian, errugabe jo zituzten terrorista bezala kartzelaratu nahi izan dituzten langile euskaltzaleak. Bitxia da, baina El Jueves astekaria ere bahitu zuen Juan del Olmo epaile "aurrerakoiak" 2003an hasi zuen epaiketa honi, epaile kontserbador batek (Javier Gomez Bermudezek) eman dio amaiera. 12 urte dira, bestalde, Baltasar Garzon epaile aurrerakoiak Egin itxi zuenetik, eta begira gaur egun zein ego-

eratan dagoen Pinocheten amesgaizto izan zena: La Hayara ihes egin behar izan du Audiencia Nazionalen sagar ustelik nahi ez dutelako (kupel osoa ez al zen ustelduko dagoeneko?). Epaileak beste epaile batzuk epaituz, eta guzti- en atzetik, Falange, Dignidad y Justicia, AVT eta frankismoaren beste hainbat oinordeko justiziaren irizpideak nondik nora joan behar diren epaituz. Eta bitartean, komunikabide batzuk itxita, eta besteak zer argitaratu eta zer ez presio politiko-judizialen arabera erabakiz. Adierazpen eta informazio askatasuna? Utopia polit bat besterik ez, momentuz.



eguraldia



MAXIMOA

+31

MINIMOA

+12

Bero kontuekin jarraituko dugu gaur: hego haizea eta tenperaturak gorantz. Arratsaldean, trumoi-ekaitzak jotzeko arriskua.

www.euskalmet.net



Orain da garaia!



ARIZMENDI IKASTOLAREN LANBIDE HEZIKETA

ERAIKUNTZAKO PROIEKTUEN GARAPENA ETA APLIKAZIOA • GORPUTZ ETA KIROL EKINTZEN ANIMAZIOA
OBRA ETA PLANEN BURUTZAPENA • ERIZAINZARAKO LAGUNTZA OSAGARRIAK

AURREMatrikulazio EPEA
MAIATZAREN 31 TIK EKAINAREN 11 RA



902 11 20 25

LANBIDE@ARIZMENDI.IKASTOLA.NET
WWW.ARIZMENDIPRO.EU

Arizmendi
ikastola